

四庫全書

史部

欽定四庫全書

史部

福建通志卷四十八

詳校官監察御史臣陳化龍

檢討臣德生覆勘

總校官檢討臣何思鈞

校對官中書臣張曾炳

謄錄監生臣王思福

欽定四庫全書

福建通志卷四十八

人物六

邵武府

唐

謝望 建寧人唐時為鎮將嘗領兵討賊縣有寨即望屯  
兵處子彥斌襲職鎮將黑面長髯人稱為黑龍禦

寇有功官  
至招討使

上官洎

邵武人乾符末為鎮將時黃巢自浙東踰江西  
破饒吉虔信等州刊山開道直趨建州洎與子

蘭領兵禦之誓曰不收黃巢九泉之下不敢見先君抵建昌拒賊力戰父子皆遇害事聞俱贈將軍

陳巖

字夢臣建寧人慷慨有智畧乾符間黃巢轉掠福建諸州巖聚衆數千保鄉里號九龍軍巢不能為

害時邑為黃連鎮巖表為義寧軍僖宗以巖為義寧鎮將賜鼓角置牌印中和四年破黃巢部將於福州福建觀察使鄭鑑表為團練副使尋表巖自代巖為治有威惠先是城壁公府學校為巢焚蕩幾盡乃悉力完輯閩中遂安光啓二年王潮據泉州聞巖威名不敢犯境遣使請降巖表潮為泉州刺史及疾遣使召潮欲授以軍政未至而卒

宋

龔慎儀

字世則邵武人任南唐為禮部郎中開寶初以太祖命齋李煜書往招劉鋹被執鋹亡得歸除

駕部郎中歙州刺史後歸宋仍守歙宜春賊盧絳領  
衆數千陷歙且趨閩欲引慎儀為謀主慎儀厲聲曰  
吾已受宋命雖一日失援肯從賊叛耶絳怒殺之舉  
家遇害子識字默甫端拱進士擢監察御史從真宗  
東封還拜殿中侍御史宋初襲唐制御史不專言職  
至是擇學術醇正操履端方者入臺言事蓋自識始  
官終平江軍節度副使

龔穎

字同秀慎儀從子隨李煜歸宋除御史言事多稱  
旨嘗憤叔父慎儀為盧絳所害及絳來歸入見穎

袖鐵簡直前擊絳首太祖驚問穎俯伏言故太祖嘆  
曰江南小國有義士若此耶遂誅絳義穎而釋之謫  
知舒州太宗立轉殿中侍御史大中祥符二年致仕  
官至銀青光祿大夫檢校司徒持節營州諸軍事兼  
御史大夫上柱國瑯琊郡開國侯卒年八十三穎立  
朝論諍慷慨卓犖人憚其丰采號曰端公所著有正

已箴李綱  
為之跋

龔極

字日拔穎次子太宗時擢承直郎叅政陳恕有疑獄不能決極頃刻立斷薦為太子右贊善咸平初

拜御史中丞因日食上疏言王顯貪讒宜罷之以答天譴次年以顯為樞密使極復疏論顯不宜典軍政乃罷顯後契丹入寇以顯為都部署顯表極為監軍欲中害之極請往真宗不許曰卿直言無隱不宜離朕左右嘗顧謂李迪曰  
人臣如極豈可多得

上官凝

字成叔邵武人慶歷二年進士調銅陵尉部使者以苛察威所部凝獨不屈部使愧謝戒邑吏

以尉為法秩滿有老叟十數人送至境上餽藥數器行數里發之皆金也追而返之曰吾不私汝汝忍私吾調潭州司理叅軍郡多滯獄凝辨察當罪人無冤者歷知分寧安邱山東大蝗旁邑被害凝境上有鳥

萬數羣食之歲獨大熟熙寧三年遷尚書職方員外郎通判處州卒民為之流涕子塏官至中允廣東轉

運判官治

有異蹟

虞肇

字公初邵武人慶歷二年進士充御史臺推直用法明審出知南安縣尋謝歸

高照

邵武人慶歷六年進士任處州司理叅軍時郡有盜逼脅良民捕者利賞誣以真盜將論死照察其

枉者百餘人出之

謝訶

字誠甫建寧人治平四年進士初令臨川人稱為謝冰壺改宰清江歲大饑發粟賑濟時當除夕猶

宿於郊後守汀州贈宣奉大夫

上官均

字彥衡凝子熙寧三年初革聲律以策試士均入對數千言無所顧忌呂大臨蘇軾擬均第一

以不奉新法置第二授大理評事歷光祿寺丞元豐  
間賜對垂拱殿神宗問治天下何先均言以道為主  
察理則是非明審官則邪正辨尋拜御史裏行疏言  
蔡確持刑刻深所辟官皆恃勢凌轢治獄慘酷謫光  
澤令元祐初再除監察御史時議試士兼用詩賦宰  
臣欲盡黜經義均言經術以理為主詩賦以文為主  
宜獎經術重根本以堅學者之志令學者各占三經  
雜以論語孟子不必專用新義章三上經術得不廢  
詔舉諫官及外監司之選均請以所舉盡報御史臺  
覈得失以收真才又再疏請罷青苗法以復常平青  
苗遂罷加武騎尉上言治天下之道寬猛相濟而已  
熙寧以來務為慘刻弊在傷猛陛下臨御務從寬大  
諸道監司縱弛苟簡弊在過寬願明詔四方以寬不  
縱惡恩不傷惠之意詔下其疏布告諸路時蔡確弟  
軍器少監碩盜貸官錢以萬計獄具均請并正確罪  
以勵百官遷殿中侍御史乞罷職除禮部郎五年再



授殿中侍御史會蘇轍黨呂大防排許將均言將以  
異論罷諫官御史不敢異言執政臺諫曲為隨順紀  
綱法令自此敗壞乞加蘇轍妄言之咎大臣指均為  
朋黨宣仁太后言上官均無罪乃出知廣德軍紹聖  
初召為右正言論治天下六術曰審好惡辨邪正察  
衆言謹政令操要術明賞罰又論呂大防六罪再疏  
罷之章惇欲專政陰去異己者出吏部尚書彭汝勵  
而召朱服為中書舍人均上疏力爭忤惇意遷工部  
員外徽宗即位拜起居郎入對陳治道四要累遷給  
事中言人主之學在於知要適用願於燕閒觀閱經  
史以明義理之大達治亂之體因進對之臣以考政  
治之得失觀羣臣之志趨則義理邪正判然別白疏  
入忤旨未幾紹述說興均復不從遂以龍圖閣待制  
出知永興軍徙知襄州尋入元祐黨籍奪職政和間  
起龍圖閣待制致仕封文安縣開國男加開國子益  
封五百戶卒贈通議大夫著有曲禮講義二卷奏議

十卷廣陵文集五十卷

孫諤

字正臣邵武人熙寧六年進士累官右正言守正不阿力論楊畏在熙豐間議與朝廷合元祐末呂

大防蘇轍等用事盡變其趣而從之紹聖初又變其趣偷合詭隨天下謂之三變乞加顯黜畏遂落職又言役法不均忤蔡京出知廣德軍後入元祐黨籍諤善刑書精陰陽星厯之學有奏議解經雜著文集四十卷子縝紹興五年進士為郡有政聲

鄒棐

字堯叟泰寧人有文名工詞賦壯游四方從劉彝學浸灌六經貫穿百代熙寧六年登進士仕終宣

城令弟括厯知亳州蔡京當國謝

病去後李綱以書招之亦不出

李深

字叔平光澤人熙寧九年進士由濟陰簿厯鄱陽遂平二縣以清慎稱名為編勅所詳檢役法文字

與蔡京章惇廷爭奪官遷朝散郎陞辭復以言事罷  
崇寧中安置復州入元祐黨籍有杭川集二十卷弟  
勉紹聖元年進士知尤溪順昌二縣負氣節多忤於  
時亦入黨籍子階由鹽城尉攝臨安比較婺州卒陳  
通脅階叛階  
不從遂遇害

李夔

字師和邵武人元豐二年進士與楊時友善尉華  
亭有政聲累官右文殿修撰終龍圖閣待制子綱

傳有

謝皓

字德夫詞從子元豐五年進士由南劍司戶歷瑞  
洪二州司理獄無幽滯吏不敢欺累官金部郎大

觀三年金使至要索無藝接伴使張開不能對徽宗  
命皓代之還以對語錄奏稱旨乃以太常少卿充賀  
正旦國信使歸條具北地山川地理名物以聞遷司  
農少卿出歷建昌南劍絳州三郡考績皆最嘗持公

廉二字以教子弟尋請老奉祠卒年八十

上官恢

字閔中邵武人元豐八年進士歷知南劍州移

多所寬貸晚丐祠有過其里者輒指其居曰此熙豐名儒也胡安國上書宰相言恢諳歷世務端重有守與楊時同薦於朝官至中大夫封歷陽縣開國男食邑三百戶

龔夬

字道亨邵武人元祐六年進士以薦授著作郎韓忠彥言夬忠直可補糾彈之職名為殿中侍御史

即抗疏明元祐黨人之寃有旨徙黨人於內地又劾蔡京章惇夤緣為奸在君側則蔽主聰在州郡則害蒼黎京等銜之謫監揚州稅名入元祐黨人碑

黃中美

字文昭邵武人紹聖元年進士知衛縣以修河功轉真定府錄事移信德軍宣和末弄臣竊柄

建取燕雲之策捷書至官吏相慶中美獨憂之俄河  
北盜起金人乘勢攻信德官吏皆降中美奮死以守  
城陷有挺刃脅之降者中美左右踣之而逸金人退  
去宣撫使奇其節俾行軍事撫摩瘡痍民復安堵靖  
康初張邦昌僭逆感憤卒子永存字堅叟紹興二十  
四年進士累遷淮南轉運副使常修農戰之業以圖  
北向官至正議大夫孫公  
紹咸淳初進士著有韻會

謝黻

字彥章詞子紹聖元年進士提舉河北常平倉值  
改鑄當十大錢黻言誘民為奸利舊錢且盡不可

蔡京惡其不附已出判虢州復謫監漳州稅出納惟  
謹漕使行部謂曰公嘗供奉赤墀何躬行筦庫事耶  
黻曰乘田委吏聖尚勤思黻敢憚勞後判潭州除吏  
部郎中不肯附和權貴復判興化軍以親老乞祠歸  
劉冀  
字伯廣建寧人大觀三年進士累官開封府尹時  
秦檜專主和議冀力爭之隨劾檜誤國罪狀檜怒

欲置之死遂拂袖歸  
逾年卒著有雲峯集

李綱

字伯紀夔之子政和二年進士累官監察御史權

殿中侍御史遷起居郎宣和元年京師大水疏言  
陰氣太盛當以盜賊外患為憂請監沙縣稅歷太常  
少卿七年金人渝盟邊報至詔勤王命皇太子為開  
封牧綱上禦敵五策因語給事中吳敏曰巨敵猖獗  
如此皇太子恭儉聞天下宜假以位號乃可守宗社  
收將士心敏遂入告且言李綱論與臣同有旨召綱  
綱刺臂血上疏內禪之議遂決欽宗立遣李鄴使金  
議割地綱奏祖宗疆土當以死守不可尺寸與人議  
遂寢除兵部侍郎靖康初斡里雅布渡河上皇東幸近  
臣請帝幸襄鄧以避鋒太宰白時中謂都城不可守  
綱曰都城有宗廟社稷百官萬民捨此何之但當整  
飭兵馬固結民心堅守以待勤王之至時中忿曰李  
綱莫能出戰否綱曰陛下不以臣庸懦使治兵請以

死報乃以綱為尚書右丞又以為東京留守會內侍  
奏中宮已行欽宗復決意南狩比綱趨朝而乘輿已  
駕乃頓首泣請言六軍父母妻子皆在都城願以死  
守狀欽宗感悟命輟行綱傳旨曰敢有言去者斬禁  
衛皆呼萬歲遂以綱為親征行營使便宜從事綱治  
守戰具躬自督戰募壯士縋城斬酋長殺其衆數千  
金人知有備乃退而議和求歲輸金幣千萬割太原  
河間中山三鎮以親王宰相為質綱力爭不獲求去  
欽宗慰留之會种師道姚平仲以涇原秦鳳兵至綱  
奏敵兵號六萬而勤王兵集城下者二十餘萬若扼  
河津絕饑道分兵復畿北諸邑而以重兵臨敵營俟  
其食盡力疲以一檄取誓書復三鎮縱其北歸半渡  
擊之此勝計也欽宗然之而姚平仲急於要功先期  
率兵夜斫金營綱奉旨出援以神臂弓射金人於幕  
天坡却之金使來讓乃罷綱以謝金人太學生陳東  
等上書明綱無罪軍民集闕下者數十萬命綱復為

尚書右丞充京管守禦使綱下令悉兵出戰衆皆踴躍金人懼乃退師除知樞密院事詔迎太上皇還京綱請行至則具述皇帝仁孝語多調和兩宮上皇感泣賜玉帶金魚象簡時北兵已去上皇還宮綱與樞密許翰深以邊事為憂議調防秋兵吳敏乞置詳議司議法制以革弊政以綱為提舉官耿南仲沮之除河東北宣撫使以援太原復詔減諸路兵綱疏爭之不報旋有詔止綱進兵許翰吳敏先後皆罷謫綱知事不可為上疏丐罷金兵再至復起資政殿大學士領開封府事綱拜命即率湖南之師入援未至而都城失守矣高宗即位拜尚書右僕射力陳十事一議國是二議巡幸三議赦令四議僭逆五議偽命六議戰七議守八議政本九議久任十議修德高宗榜其議於朝堂唯乞斬張邦昌罷偽官二事留中不發黃潛善等主邦昌甚力綱因泣陳臣必不可與邦昌同列當以笏擊之陛下必欲用邦昌請罷臣語甚激切



內侍皆為流涕於是高宗乃貶邦昌謫諸受邦昌偽命者以綱充御營使奏於河北置招撫司以慰忠義之心壯聲援之勢薦張所傅亮為河北東宣撫經制使復上募兵買馬募民出財助兵三疏請幸關中圖復舊都高宗頌詔兩京諭以還都之意讀者皆歎歔泣下既而黃潛善汪伯彥勸駕幸東南復罷宣撫經制二司綱再疏求去詔罷綱提舉洞霄宮會陳東復以諫留綱坐誅綱遂落職車駕東幸兩河遂相繼淪沒矣紹興二年除觀文殿學士湖廣宣撫使四年冬金人來攻綱具防禦三策又奏於淮東西及荆襄置三大帥屯重兵徐圖收京還都之計建康江山雄壯請權駐蹕以收西北人心勿為退避之謀勿遣和議之使內治修明以圖大舉因條上六事除江西安撫制置大使兼知洪州有旨赴行在入對陳用兵措置之失備豫善後之宜十餘事屬王倫使金迎梓宮階金使至以詔諭江南為名綱言卑詞厚幣廢祖宗之

業失生靈之望請詔羣臣講明長久之策與衆議不合九年除知潭州荆湖諸路安撫使力辭不赴明年卒年五十八贈少師謚忠定官其親族十人綱以身負天下之望以用舍係社稷安危忠誠義烈凜然動遠邇每宋使至燕山必問李綱趙鼎安否其為北庭所畏服如此著有易傳內篇十卷外篇十二卷論

語詳說十卷詩文奏議制誥表劄雜著百餘卷

季陵

字延仲其先處州人占籍邵武政和二年進士建炎初除太常少卿金人南侵高宗倉卒趨杭陵獨

奉九廟神主以從遷中書舍人會久雨下詔求言陵上疏以制將帥抑宦寺修德應天為務又言建康為敵人所必攻之地九江上流有建瓴之勢淮南諸郡有唇齒之憂宜以重兵扼守罷知太平州厯官戶部侍郎紹興中以徽猷閣待制知廣州卒於官子璧圭皆顯

上官悛

字仲雍均次子政和二年進士累官太學正高宗立改宣教郎二帝北狩悛上書相府請車駕

入京款謁廟社慰安士民遴選將帥蒐簡士卒以圖興復又上書論朝政之宜建炎中累除員外郎以親老丐祠紹興五年知南劍州卒著有尚書小傳論孟畧解及史統史旨

朱震

字子發邵武人政和五年進士以胡安國薦召為司勳員外郎趙鼎為相薦震學術深博廉正守道

高宗召至問易春秋之旨具以所學對累遷祕書少監兼侍經筵高宗曰天生朱震范冲為今日資善得人轉給事中遷翰林學士時處州多盜震曰使居官者廉而不擾百姓自安雖誘之不為盜矣願詔太守到官日條具官吏貪墨無狀者一切罷去擇慈惠有治効者優加獎勸高宗下其奏於諸路尋乞祠歸有易集傳易總說行世

李平西

綱從子知澧州專務德化誨民孝弟勸課農桑累遷樞密院承旨金人攻汴與伯父綱畫守禦

策金兵再至乞詔諸道勤王兵決策一戰執政不能用又綱族孫東受學於朱熹隆興元年進士為廬陵簿秩滿周必大贈詩云地跨江南秀氣兼玉成界尺直方廉西曹久處習鑿齒高士惟知孫子嚴遷知萬

安黃幹亦嘗薦之

何兌

字太和邵武人重和元年進士授廣西提刑檢法官東平馬仲撫諭廣南見而賢之奏為屬授以程

氏中庸之學靖康初秦檜為中丞仲為殿中侍御史時金令推立異姓仲曰此天位也安得易檜入議狀連名書之張邦昌偕逆檜被執北去獨伸主臺事移書邦昌斥使避位且檄取復辟之期尋被貶死兌私輯其事狀紹興中檜南歸擅掠靖康反正之功兌將取所輯事狀達尚書以明仲忠子鎬勸侯檜死後上

之兌曰萬一先死瞑目有餘恨矣卒上之檜怒下兌  
廷尉竄英州檜死復原官歸里門談笑語所親以馬  
先生事得白為快奉祠一年卒著有易傳鎬有  
學行學者稱為臺溪先生有臺溪集數十卷

上官悟

字仲達均季子以父廕累官轉運使建炎三年  
留守東京劉豫叛降金金以豫節制京東兵馬

遣人說悟使降悟斬其使豫賂左右說降悟復斬之  
金兵攻東京益急力不能支城陷死焉贈朝散大夫  
右文殿修撰  
官其後五人

李郁

字光祖先澤人嘗受業於楊時時奇之妻以女初  
郁聞時論退而求之不合乃獨取論孟讀之蚤夜

不懈渙然有得時歿以其學淑後進嘗語學者曰聖  
賢遺經讀之又讀於無味處益致思焉至於羣疑並  
興寢食不置然後當驟進耳紹興中以遺逸薦名對  
便殿高宗改容傾聽授迪功郎後因秦檜用事遂築

室西山讀書所著有易傳叅同契論孟遺  
藁朱熹嘗表其墓學者稱為西山先生

黃中

字通老邵武人紹興五年進士第二人授保寧軍節度推官改宣義郎秦檜惡其不附已輒斥外徙

至二十餘年檜死召為校書郎充賀金生辰使兼賀正使還言金治汴宮役夫萬計此欲徙居見逼宜早為計湯思退惡之徙秘書少監中猶以邊備為言不聽乞補外不許除起居郎兼中書舍人孝宗即位遷國子祭酒兼給事中執法不阿羣小媒孽之特旨罷中書舍人致仕久之召為兵部尚書兼侍讀又以言不盡用乞歸淳熙元年孝宗手書訪以天下利害朝政缺失進端明殿學士累封江夏侯卒贈少師謚簡

肅有奏  
議十卷

黃克仁

字已任光澤人紹興十八年進士陳書萬言忤時相聞者縮首歷守真化雷三州

張敦義

字行可建寧人紹興二十四年進士由醴陵尉遷衡陽司理有尉捕盜未符賞額乃羅織平民

充數敦義廉得實為直其寃憲司與尉同里怒其不為尉地欲劾之毅然曰天可欺乎吾寧以一官易數

命獄上卒得白後以通直郎致仕

黃通

字景聲邵武人隆興元年進士以不附韓侂胄出為江西提刑遂請老歸自號熙堂野老

上官粹中

字德厚均再從曾孫隆興元年特奏名調武岡軍僉判零陵有重囚久不決粹中推詰片

言而定秩滿知增城縣勤恤民隱獎進士類勸農桑興水利漕使林光朝上其治行於朝

俞豐

字應南建寧人乾道二年進士除建陽尉獲盜不受賞曰捕盜職也受賞是利民為盜矣累遷司農

丞稽覈財用出入得實出知秀州奏罷公庫効力酒陋例及搞軍庫每歲見錢八萬貫以最聞累遷中書

舍人除吏部侍郎因早上言當振紀綱削外戚權不報遂奉祠歸居雲谷自號雲谷老人

上官基

字仲立恢曾孫乾道間以父廕監建康倉調興國丞會歲歉當賑令欲候報基曰民難久待有

謹身當之即計口賑給遠近皆得就糴調衡州推官丞相趙汝愚謫零陵道經衡陽卒時韓侂胄用事沿途迂送者皆獲譴臺司畧不敢為汝愚營辦基獨經紀其喪郡守錢鏊上其治行遷提點鑄錢檢討官卒子銓好學能文補登仕郎

趙善恭

字作肅宋宗室居邵武乾道八年進士由承務郎累遷右司郎中適開禧用兵力陳不可輕動

拂主議者意出知潭州荆湖南路安撫使移江陵府荆湖八路安撫改湖廣總領兼知鄂州權宣撫司事凡歷三帥專以安邊靖民為事生平清儉寡慾經史外惟以一琴自適



任希夷

字伯起邵武人從朱熹學篤信力行熹器之弱冠登淳熙二年進士調蕭山丞先是官蕭山者

以俸薄秩未皆倍支希夷計公廩悉還官熹貽書美之曰推此無往不為義人遷太常寺簿奏修紹興以來禮書累遷禮部尚書請周敦頤程顥程頤張載賜謚進端明殿學士權叅知政事卒贈少師謚宣獻

黃渙

字德亨光澤人嘗從呂祖謙學淳熙五年舉南省第一後守岳州罷厨傳蠲魚稅捕淫巫治績甚著

謝師稷

字務本邵武人淳熙中由懷安丞累遷福建提刑除建劍汀邵四郡數鹽之弊又奏免輸鐵葉

錢尋領漕事後以集英殿修撰知平江府擢節浮費未滿歲積錢四十萬緡郡城壞以所積繕完之師稷端重廉介歷諸道臺牧所去見思以老乞祠轉中大夫致仕

吳炎

字濟之邵武人紹熙元年進士累官太學博士值韓侂胄擅政乞外判建寧歷知江陰軍陸辭日極

言諸法紛更大失人心又乞復祖宗治賦吏舊法至郡寬征嗇用以其餘葺郡學貢闈繕黃田閘以溉民

田改興化軍奉祠歸

鄒應隆

字景初泰寧人慶元二年進士第一累官起居舍人與韓侂胄議開邊不合出知贛州建慈幼

院收養不舉子括諸邑逋租贍之侂胄敗擢中書舍人嘉定初權吏部侍郎歷給事中以言事切直出知泉州時南內宗子商於泉多橫恣應隆以法繩其稔惡者累官廣西經畧平黎州盜誅邕蠻之為亂首者理宗即位召拜工部尚書以抗疏請留真德秀魏了翁為權貴所忌諷言者擠之遂奉祠尋除禮部尚書會郊祀雷雨因陳修省之說復值邊警疏上十事俱極剴切嘉熙初拜端明殿學士權叅知政事舉賢才抑近倖夙夜以天下為念屢以老請適諫官有言即日就道理宗書南谷二字賜之卒贈少保謚文靖從

弟應博歷知婺蘇二州提點  
江西刑獄真德秀嘗薦之

李呂

字濱老光澤人蚤孤事母孝聚族千指昕夕序揖  
致禮自少至老不少變晚見朱熹於廬阜遂訂交

邑令張訢行社倉呂佐之條畫  
詳明綜理精密朱熹為之記

張汝明

字晦叔建寧人嘉泰二年進士辟宜章令有劇  
盜號飛虎汝明結以恩信遂惴服邑有武靈侯

廟老巫數十輩倡言惑眾每迎奉涉水以濟邑令皆  
避堂居之否則為災邑民爭迎之有交兵者汝明諭  
眾曰神欲人安不宜令民涉水令與神分理幽明宜  
居寺不宜總官舍祭在誠不在物其以蔬果薦巫不  
悅謂必大災汝明下巫於獄誡曰今歲災則藝汝以  
謝皆泣拜邑亦無災判漢陽軍董築黃州城議於齊  
安門外磨旗山更築外城以絕寇盜  
窺探之患再辟四川餉幹卒於道

上官渙酉

字元之，恢曾孫。嘉定元年進士，累官鎮江通判，修丹陽塘岸以備灌溉。除知真州兼淮南

運判，值邊警，渙酉勦忠武軍五百人，別為營壘以壯守衛。節浮費，糴米萬五千石以備荒。淮陰盱眙道梗，乃造舟通海以運軍餉。歷知池州、池陽、江濶，遠備禦久疎，賊哨直抵江岸。渙酉繕舟楫，治戎器，簡士卒，勦營寨，寇知有備，引去。累遷右曹郎官，上疏首陳邪正是非之辨，次論屯田、軍政之弊。陞大理寺卿，復論國勢人材，運餉流民數事，言尤忠切。後以集英殿修撰致仕。進階朝議大夫，封。歷陽縣開國男。

劉剛中

字德言，建寧人。少力學，好為文詞。喜老莊、荀、楊、書及登朱熹門，以所業對熹曰：「老莊壞人心術，非所宜學。自是篤志正道，熹易其字曰：近仁與黃幹友，善歸築室講學。遠近人士翕然從遊。舉嘉定四年

進士。丞蘭谿，卒。有師友問答一卷。同時邵武人饒幹，字廷老，俞聞中字夢達，吳壽昌字大年，梁琢字文淑。

馮允中字作肅葉寅字直翁  
皆從朱熹遊論著多所發明

杜杲

字子昕邵武人嘉定間以廕授海門鹽場官辟江  
淮帥幕金人圍滁杲率偏師往援登陴中矢勇氣

益奮卒全其城調江山丞辟監崇明鎮與總領岳珂  
議不合三疏劾杲奏皆寢淮西制置曾式中辟為廬  
州節度推官浮光兵變杲以單騎誅首惡衆遂帖然  
徙知定遠會邊警至朝議以杲久習邊事推知濠州  
歷陳守境之利出師之害及洛陽兵敗邊釁漸開人  
服其先見除知高州尋改安豐元兵來侵杲募壯士  
設方畧敗之捷聞璽書獎諭進三秩叅知政事徐榮  
叟謂丞相李宗勉曰帥淮西無逾杜杲詔以安撫兼  
廬州進大府卿淮西制置副使元將察罕擁兵圍廬  
州杲敗走之又以舟師扼淮河遣其子庶伏精銳於  
要害元兵不能進遂北歸請老不許累擢沿江制置  
使知建康府復敗元兵於真州理宗嘉勞親書安淮

堂以賜累官龍圖閣學士杲淹貫經史晚年專意理學嘗言吾用兵無悖謀無左畫皆得之四子書子庶制置使知揚州為賈似道所構生死

李閔祖

字守約呂之孫蚤從朱熹講學篤志彊力精思切論熹留之家塾編中庸章句或問輯畧嘉定

四年登進士調臨桂簿提刑方信孺漕使陳孔碩皆咨決之暇日詣學與諸生講解士習丕變辟古田令改廣西帥幹勤慎明恕諸司論薦改秩未赴卒有問答十卷弟相祖朱熹命編書說三十餘卷辨質詳明用心精切幼弟壯祖同登第尉閩清熹嘉其有志真德秀薦其為人物典刑

葉武子

字成之邵武人與李方子善同受學於朱熹補太學生時議函韓侂胄首與金請和武子曰奸

臣首不足惜如國體何率同舍生力爭之嘉定七年登進士累擢知處州奏除苛征之弊麗水盜袁千六

等竊發捕者執讐民以歸武子問實得三人斬以徇  
餘釋之民大服盜亦息入為宗學博士論罷福建鄉  
保催科之弊尋請老淳熙初賜詔  
褒美加直龍圖閣進秘閣修撰

李方子

字公晦光澤人朱熹高弟初見時熹謂曰觀子  
為人自是寡過但寬大中要規矩和緩中要果

決遂以果名齋嘉定七年廷對第三調泉州觀察推  
官真德秀為守稱其學邃氣平本經術明世務每大  
事必咨決之秩滿不肯通書廟堂史彌遠不悅除國  
子錄將選宮僚不少貶以求合或指為德秀黨劾罷  
之既歸學者羣登其門嘗曰吾問學未盡幸於大本  
上有見此心常覺泰然著有傳道精語等書弟文子  
淳熙進士

丁從龍

泰寧人紹定中以擊盜功授保義郎端平二年  
領兵淮安城下與賊力戰敗之復淮安轉忠翊

郎八月遇盜於廣西懷集縣血戰  
死詔遣官致祭立廟懷集復其家

### 上官渙然

字文之渙西弟淳祐元年進士辟准備差遣  
元兵圍安豐渙然巡視江面犒師上流圍解

進階尋辟淮東幕督運吳門閱月運米六十萬石右  
相趙葵制使吳淵皆一見偉之累遷戎簿陸對首言  
正君心明公道培善類以壯君子之脈容直言以伸  
公論之氣次言邊事深以玩敵為戒復條守邊三策  
以獻累遷  
右司郎

### 危昭德

邵武人寶祐元年進士歷遷祕書郎疏言國命  
在民民命在士大夫士大夫腹民以自腴民不

堪矣進兼侍講條厲民四弊乞為萬世根本之慮為  
一時倉卒之防又乞察欣愉休戚之故酌利害損益  
之宜累遷殿中侍御史諫作崇陽宮權工部侍郎同  
修國史致仕昭德在經筵時以易春秋大學衍義進



講規正甚多子徹  
孫登咸淳進士

元

龔雍

字行簡邵武人至元間充史館編修上疏言懿州秦州地震南山土崩壓死居民天之變也濟人可

以回天請給米賑之復上古今災異君德修禳書三集改國子監崇文閣大學士秦定丁卯皇子受佛戒智泉寺雍著儒釋辨議上之不報復抗疏力諫帝大怒賜死叅政左塔布台曰雍言雖狂妄出忠悃乃免出為江西中書叅議致仕

明

吳言信

邵武人洪武辛未殿試第三人授翰林編修太祖常與皇長孫議邊事召言信執筆口授訓將

練兵驗視封疆險易精造軍器勅諭各鎮邊臣撰次  
畢太祖顧皇長孫曰汝諦視之當使邊塵不起貽汝  
以安也後靖難兵起不知  
所終或謂其舉家死難

何道旻

字伯清秦寧人洪武末為大理評事獄多平  
反遷監察御史出為江西副使討贛賊陳平戮

之移湖廣建言時事得失皆見採納坐事免永樂初  
起廣東按察僉事奏黜憲使貪墨行部雷陽修壞閘  
溉田七十萬頃宣德初知永  
州府歷事四朝清白著聞

吳璽

字信玉邵武人永樂戊子鄉薦歷武選主事宣德  
中累官戶部侍郎凡四方萬國人民版圖廩庾帑

藏及國家經費出入盈縮莫不精究營度得宜正統  
中邊臣貢馬英宗問戶部馬匹芻豆之數璽以疾在  
告同官未能對連及  
璽下獄論戍二年卒

張誠字自明建寧人永樂辛卯進士任監察御史遇事敢言巡按交趾彈劾鎮守大臣及中貴之不法者

繼巡浙江湖廣風節凜然

黃原昌

字德順建寧人永樂乙未進士授行人有氣節宣德改元頒詔占城宣王化正朝典占城君長

叩首請罪贈以金帛奇貨悉却之復命陞戶部員外時奔競風熾原昌恥隨流俗請老歸

陳泰

字吉亨邵武人永樂癸卯舉人以司訓擢監察御史巡按貴州大軍征麓川歲取土兵二千為嚮導

將士失利輒取土兵首級冒功泰罷之改巡山西劾罷都御史陳智侍郎李庸祭酒貝泰及藩臬州縣之貪殘者悉置之法繼巡山東疏數千言以選賢去奸為本擢四川按察使不踰年蜀中大治天順中以諧左遷廣東按察副使四川寇亂起左僉都御史巡撫其地州郡貪吏望風解組者百餘人轉副都巡撫

淮陽  
致仕

龔敷

字時敏邵武人正統丙辰進士由主事歷官都轉運使常額羨餘月計二千兩悉不取其友風之毀

曰我恥居官者動云好官多得錢毫無為民之意朝廷何賴此臣為後以剛直為時所忌解組歸囊橐蕭

然至不能  
具菽水

鄒允隆

名昌以字行泰寧人正統壬戌進士授太常博士改太僕丞奉使安南時安南經黎季犛之亂

久昧朝儀允隆據禮裁正丰度肅然復命轉廣東提學道僉事訓諸生以立身行道之要不徒章句文字

而巳尋  
卒於官

謝爌

字世彰邵武人景泰辛未進士拜監察御史同官朱驥奏留湖廣巡撫李實德堪內輔掌臺綱總憲

謂其間已論罪當斬嫌曰御史職在進賢退不肖惡  
可以奏事不實杜言路耶巡按遼東都御史寇純以  
軍情誣奏參軍胡某及所部將士五百餘人勅嫌按  
之衆心洶洶謀殺純嫌出諭之衆皆懽呼羅拜乃以  
權宜發遣而自劾專擅之罪少保于謙奇之改南京  
御史清戎淮甸居臺九載論列百餘疏咸切機務成  
化中擢兩淮都運使兩淮鹽利皆國戚中貴所據嫌  
一裁以法又擒殺豪民之素為民患者轉廣東參政  
有流寇擁衆犯潮惠嫌計擒  
魁醜三百餘人以疾乞歸

余志

字志學建寧人吏部員外隆子天順甲申進士官  
刑部主事疏陳備邊二策有言其越職宜坐罪憲

宗置不問志上言臣言為非不宜再厠班行若臣言  
是乞置對辨白詔下吏鞠狀乃斥言者志亦出判廣  
州安輯流民三萬口  
陞知石阡府致仕

朱欽

字懋恭邵武人成化壬辰進士授寧波推官以卓異召拜御史累擢都御史巡撫山東首劾方面官

之不職者時劉瑾遣使索綵繒五百疋欽斥之趣歸瑾又陰中同監王岳謫守皇陵賜死臨清欽疏其矯制擅柄之罪乃誣欽以枉法繫獄瑾敗復原秩致仕著有畏庵集

吳綱

字宏舉建寧人弘治庚戌進士授工部主事奉差疏濟河輸漕運開泰山三十六泉以便水利丁憂

廬墓服闋上京劉瑾方熾人告綱曰欲遷官非數千金不得綱嘆曰吾豈以賄中貴博一資哉拂袖歸林下二十年不跡公府

危行

字世隆邵武人弘治壬戌進士授樂安令樂安民健訟多逋負行至堅持清苦有來訟者曲為講析

微輸贏餘一介不取直港賊至以計收之擢監察御史兩折權貴獄奉命巡江值劇賊剽掠行力疾起視

軍事卒於官  
貧不能殮云

米榮

字仁夫邵武人嘉靖壬辰進士授太平推官歷湖廣僉事值歲歉賑濟民有得米則生之謠長沙巨

寇梅四保李楚俊元壇鬍子聲勢相倚榮設反間計令自讐殺不煩一兵撫其餘黨悉解散尋以叅議致

仕著有介庵  
集年七十卒

陳俊

邵武人嘉靖中以貢授崇義令捐俸闢兩嶺路民為謠曰高不熾曲不危陳侯功與山齊歷判饒瑞

惠三州嘗出奇兵擒惠州巨寇熊轉二  
餘黨悉散以功陞雲南府同知致仕

蕭永泰

泰寧人嘉靖中以胄監授廉州推官先是流賊破廉城嘯聚山峒為患永泰直抵木頭等寨諭

以禍福賊四千人皆投戈復  
業居六年陞濟寧同知致仕

吳從周

字宗文邵武人嫻韜畧曉兵法嘉靖中以貢授慶元訓導署邑篆賊首劉大眼攻城急從周悉

力制敵七晝夜不懈賊遁去以城西北當山之下敵易窺探改築外城六十餘丈於山上民呼為吳公城

擢國子學正致仕所著有備倭議左傳兵法綱目武覽居官仰鑑若干卷

徐美

字忠甫邵武人嘉靖壬子舉人知連州千戶陳宗堯肆橫美按其不法上之山寇陳龍洲掠連陽二

邑戒毋犯徐太守境美聞之曰此皆吾赤子也躬往招之遂降其衆擢承天同知未赴卒

袁泰

邵武人嘉靖中以貢任翁源令會廣西賊首盧老叔倡亂所向無前泰馳入賊營諭降之令收他賊

自贖四境悉平尋致仕歸

李春熙

字皞如建寧人萬曆戊戌進士授太平推官決獄平允鄰郡被寃者爭來就讞改肇慶推官監



軍征交趾禁妄殺削冒功所俘獲平民廉實放歸活  
千餘人遷刑部主事以執法論奏藩邸事謫彰德稍

遷南戶部  
乞終養歸

江日彩

字完素泰寧人萬歷丁未進士由金谿令陞御  
史疏言釋累臣廣杖卜糾貪橫三事及按饒河

東會計臣疏請開礦日彩奮然曰凋敝極矣復以錐  
刀貽百姓患乎疏寢其事奉命督遼餉清覈侵冒數  
十萬以功賜金幣晉太僕少卿有  
蘭臺疏草詩文集諸子摘粹行世

時瑞

邵武人萬歷間以貢判長沙大盜何震東肆劫掠  
累家巨萬黃緣當道瑞廉得其實捕之當道授意

令釋去不聽盜復陰以千金行賄瑞佯許誘其來謁  
擒之及諸貴書至則已斃杖下矣遂棄官歸瑞清正  
果斷不取一文人或嘲之嘗云吾  
自有寶要錢何為家居不改寒素

高崇穀

字柳營邵武人萬曆壬子鄉薦第一累官戶部主事督餉宣府兼理屯田馬政會中費用事遣

使詣崇穀索鐵千觚崇穀心知其求賄也弗與遂解組歸

朱嘉穗

字秀實邵武人萬曆戊午舉人授鄆城令立均役輸役二法鄆民便之值潦饑發粟賑濟全活

七千餘人歷南城兵馬司歸有澹庵詩集

陳之美

字綱存邵武人萬曆己未進士授戶部主事提督通倉遷知寧波府會海寇犯境之美指授方

畧悉討平之後歷廣東叅政有任學窺班集

江振鵬

字翼雲泰寧人天啓辛酉舉人崇禎癸未授懷遠知縣明亡不食死側室張氏季子白龍幼子

懷龍俱

殉節

李子章

光澤人崇禎間貢生歷雷州司馬會寇猖獗子章親冒矢石守禦有方晉中憲大夫尋以勞卒

官於

李翔

字颺舉邵武人性倜儻事母孝崇禎間以貢入京值下詔求言翔慷慨上書語侵權貴幾蹈不測選

新城令鄉民以爭斗作亂肆掠城市翔密設方畧平之為定斗式後死節

徐中台

字伯朗建寧人崇禎間以貢授惠州判惠濱山海羣盜出沒嘯聚無常中台嚴清保甲繩以連

坐陰加緝捕以次擒巨盜陳采陳敦賴亞三等盜風以息擢廬州同知乞養歸

元體中

字孩若邵武人少為郡諸生工制藝習韜鈴能馬上運雙戟左右刺無不中者崇禎末以破海

寇功擢守備分汛杉關七臺萑苻竊發率精銳數百討平之光澤李東球倡亂號百花英又有賽花英者

衆亦數千將揭竿起體中統五百人扼其吭而絕其  
援東球就擒會流氛告警巡撫張肯堂巡視杉關見  
體中所創壘木石棚數十處問所費曰八  
百金皆出自鬻產因具疏題薦明亡死之

### 國朝

張仕縉

邵武人順治八年以貢知徽州黟縣時海氛猖獗逃兵乘機為亂仕縉集鄉勇備器械發兵抵

祁門斬渠魁劉養心等五人又生擒賊將李龍郡守嘉其忠勇特請題叙在任興利除害育士愛民壽七

十二卒

於官

聶芳

字桂侯建寧人順治十一年以貢知巢縣縣界江湖之間地瘠民頑芳至與民休息征輸以時追呼

不擾刑罰未嘗濫及一人嘗招撫湖南流民復業上官課吏治以芳為江北諸令冠蒞任七年卒於官

馮可參

字位兩邵武人順治十八年由進士知郟城縣有惠政解任寓郟士民供薪米者七載比歸澹

泊自甘足跡不履城市會甲寅耿變舉家潛匿山谷可參日夜慟哭以憂憤死

陳洪

字弘九邵武人康熙四十四年由舉人知新化縣歲不登民採水菰為食洪至發倉賑貸罷供億吏

胥不得為奸湖南七郡食鹽仰給於淮時鹽價昂愚民多觸禁獲罪洪力請淮鹽貯長沙聽民轉販著為定例七郡均食其德邑有三虎白晝噬人洪焚牒於社虎出境署湘潭篆亦有聲尋以憂去士民立碑頌德

汀州府

唐

伍正已

寧化人初名愿字公謹大中十年進士調臨川尉累遷御史中丞自甘露變後南北司互相攻

訐大獄繁興正已畧細故持大體嘗從容諭臺屬曰有言責者非特摘發過失正當明揚善類為朝廷扶元氣耳一時士大夫為邪佞所擠者皆極力營救咸得從輕譴既而朋黨漸盛名流被錮歎曰勢不兩立吾能以杯水救車薪之火哉遂告歸卒年八十一子四泳演濬以廕補官洪隱居武陵原自號抱朴居士

伍昌時

寧化人英武多謀屢征伐有功為偏將軍王審知據汀州昌時遂居本縣之麻倉里

南唐

鄭彥華

寧化人世為本省諸州刺史彥華以勇聞南唐與周師相拒淮南彥華大小百餘戰身被五十

餘鎗累遷至鎮海軍節度使同平章事繼從後主歸宋為右千牛衛將軍

宋

江禮

寧化人乾德初任潭州判官時慕容釗討劉文表取周保權禮率鄉兵二千人力戰於湘陰死之汀

人立祠  
以祀

羅或

字仲文長汀人太平興國三年進士授大理評事雍熙後歷知惠筠成三州所至有惠愛筠喜刁訟

或曰非人好訟聽者不明耳剖滯決奸獄訟衰息澶淵之役以太子贊善扈從命與寇準叅議機務契丹乞和或為報聘使還京乞歸里朝廷嘉其勞特除諸路提點賜錦衣金帶錦旗以示褒異仍知本州事道卒

鄭文寶

字伯玉彥華子初仕南唐為清源公書記太平興國八年登進士淳化二年拜殿中丞奉使川

陝均稅奏蠲商人到岸錢行次渝涪聞夔州戍卒為亂乘舸順流一夕數百里至悉擒斬之使還加賞勞尋遷陝西轉運副使會歲歉勸富民出粟三萬斛活饑民八萬六千餘人累官至工部侍郎文寶長於詩歐陽修謂其不減少陵摩詰風味著有文集三十卷南唐近事二卷江表志三卷

伍祐

字佑之正己曾孫大中祥符元年進士歷知宜城海昌二邑以廉能稱尋差楚州團練推官州有鹽

場自唐乾符間廢至百四十餘年祐首議開復役不及民期年而就歲入官緡錢數萬公私便之稱為伍公場天聖間以薦轉承奉郎守祕書著作佐郎為人修飭寡與同列忌之出知海寧華陽二縣加上騎都尉終太常博士子擇之皇祐五年進士官祕書少監

彭孫

字仲謀連城人皇祐間劉石鵲寇江南詔募梟壯格捕孫率豪使應募及田元猛陷辰州以湖北察



訪使薦討平之繼討嶺南交趾皆有功廖恩寇閩朝  
旨命孫捕盜詹遇等起巴陵又詔屬孫悉討平之瀘  
南蠻乞第叛召對進策皆中機宜累官萊州防禦使  
隴西郡開國侯食邑一千六百戶年七十九卒於穎  
川因家焉

鄧譽

字晦之連城人皇祐間以從彭孫勦寇功擢皇城  
使熙河久叛譽畫策收復之遂命為熙河都統譽

有文武才好讀兵書性忠勇每戰輒陷  
陣先登後竟死於王事贈武功大夫

謝潛

字致虛長汀人紹聖四年進士調衢州理掾崇寧  
四年應博學宏詞科中選調瀛州教授上封事譏

切時政坐元祐黨籍更赦歷知古田弋陽建寧三縣  
有治聲建炎初畫迎取二聖策以獻晉秩二等終奉

郎議

鄭立中

字從之長汀人政和五年進士初調崇安尉時方臘餘黨寇閩立中督部民修分水寨堅壁以

守賊恃衆衝突立中出其不意擊走之改知海門未赴金人南侵擢行軍總管募福建民兵數千人轉戰收復光蔡等州尋死於難贈朝散郎官其子穆紹熙中又官其孫岫穆字應和政和間知秦興縣浚河溉

田二十頃調定遠令臬逋冠葬枯骸仕終衢州通判

雷觀

寧化人靖康間在太學時金兵渡河上皇出幸帝亦將幸襄陽李綱諫留而止金兵抵城下朝廷罷

白時中用張邦昌為相觀憤然曰此何等時不拔擢豪傑而遞遷貴臣耶遂上書極論白時中匡庸悖謬從公屏斥朝野快心不意宣麻乃用邦昌士民失望昔陳龜有言三辰不軌擢士為相四夷不共拔卒為將今金戈指闕鐵騎飲汴豈但不共而已乃不聞宣猶攷相弭變迎祥而進尸位冒寵之倫以塞賢路豈

不殆哉書入上雖不聽而新政  
懲蔽塞與陳東等皆特賜出身

**羅烈**

字子剛長汀人建炎二年進士調同安尉時寇楊  
勅自南劍趨泉烈勒兵捍捕邑恃無恐再調興寧

令會羣盜出沒烈親率千餘人擣其巢皆潰走得所  
掠子女三百餘人遣歸家終宣教郎知廬陵縣著有  
博文新說十卷古文類證數萬  
言注杜詩事類千餘條行於世

**賴紱**

字冕仲清流人紹興五年進士調程鄉尉值盜起  
紱畫策招捕境內悉平遷鎮南軍節度推官改京

秩知南劍州會漕司增敷民鹽紱知其抑  
配堅不奉命終僉書清遠軍節度使判官

**伍全**

長汀人狀貌雄偉膂力過人號為黑龍紹興間齊  
述據贛州全與陳敏等協攻披鐵鎧登城手執百

觔鐵戟轉戰萬夫披靡啓關納諸軍大破之摧廣  
東推鋒軍第十七將賜金甲名馬終武顯大夫

楊方

字子直長汀人隆興元年進士調弋陽尉不赴謁  
朱熹於崇安面受所學廣東廉憲姚孝資檄攝曲

江以廉介剛直聞改武寧丞秩滿當路交薦趙汝愚  
帥蜀辟制機宜尋薦於朝召對擢宗正寺簿淳熙末  
知建昌軍名除編修官首乞朝重華宮辭甚懇切寧  
宗立除秘書郎出知吉州偽學禁起坐趙汝愚朱熹  
黨罷居贛州閉門讀書所居植竹自號淡軒老叟黨  
禁解起知撫州嘉定中除直寶謨閣廣西提刑至則  
巡歷屬部發摘奸貪以疾卒於象州年七十八

鄭應龍

字少慈長汀人慶元二年進士調潭州理掾  
惟狂狷者以理開諭悉得其情所錄罪囚雖編點

他州皆涕泣辭謝而去有兵士盜帥金下獄誅累者  
皆坐流徙應龍力爭之帥意未決應龍曰若使罪及  
無辜有去而已帥嘆曰鄭君弱不勝衣何執法乃爾秩滿歸

邱鱗字起潛連城人嘉定十三年特奏名尉贛縣有廉聲值永定寇發郡檄攝連城篆畫計禦寇率民登

東田石以避賊鋒全活甚衆招撫使陳韡奏其功辟知建寧縣終承直郎

劉并

字清叔寧化人事繼母以孝聞端平二年進士調會昌尉時饑寇告警并部勒弓手嚴申做備寇無

敢往來者嘉熙間漕帥王埜差臨川和羅朝廷降現錢以充糴本他官皆易以楮并獨用所降錢後易楮者皆被論坐黜并由此見知辟大庾令會劇賊譚如海嘯聚檄并督捕如海就擒調辰州判官又辟知瑞金築城建學有能聲以平峒寇功改京秩終奉議郎

元

許景輝連城人元初寇攘未定景輝以防禦功授北團寨巡檢司至元間捐家貲以搞義士平諸路劇

寇又攻破偽永興巢穴授  
武畧將軍終臨江路治中

李文慶

連城人至元間福建寇起詔遣行省將兵二萬  
伐之文慶統義兵千人同往收伏士罕必闔耶

以歸除授總管後因連城盜  
起賜金牌統千兵回縣鎮守

羅良

長汀人至正間以平漳賊功授長汀尉累功授光  
祿大夫進封晉國公時陳有定有據閩之志良移

書責之有定怒攻漳良迎戰於馬岐山死之其弟屯  
田萬戶羅三亦不屈死妻陳氏自盡子安賓將兵救  
父亦自刎壯士  
從死者百餘人

陳有定

字永卿歸化人初為明溪寨兵校至正間盜起  
寧化曹柳順據曹坊寨擁衆數萬遣使至明溪

取馬有定給斬之柳順怒親率步騎來攻有定入見  
汀判蔡公安緩頰談軍事蔡授以兵直抵柳順營馳

擊之斬獲大半擒柳順以歸授明溪寨巡檢歷陞延  
平路總管已亥陳友諒遣將攻汀漳圍建寧有定率  
精銳間道赴援乘夜戰於黃土坡盡復所陷郡縣安  
撫使李國鳳上其功授福建行省平章政事遂據有  
閩中地陳友諒方國珍等來攻有定悉力拒敵屢立  
戰功時大都道絕歲遣貢舶由海道取登萊以達元  
主嘉之戊申明將湯和兵逼延平以書諭降有定大  
會諸將殺使者取血置酒中慷慨飲之誓以死報明  
兵夾水而陣戰不利乘城死守城破坐省堂按劍仰  
藥天大雷雨復甦及送京師瞑目就銅馬而死臨歿  
有詩云失勢非人事重圍戟似林乾坤今已老不死  
舊臣心子宗海聞父被執泣曰父為忠臣子豈不能  
為孝子耶遂自將藥  
來同赴京師就死

謝英輔

歸化人至正間由薦辟歷任樞密副使以老歸  
陳有定削平諸寇英輔贊畫之力居多遂與有

定同守闕地明兵入境有定飲藥自盡英輔偕  
達嚕噶齊白哈瑪爾具朝服北向再拜亦自經死

鄒大觀

字光伯清流人至正癸未進士官廷尉剛方正  
直不阿權貴獄多所平反及明將徐達入城

被執不屈羈京

八載後放歸

明

孫正通

歸化人洪武初從李文忠征勦屢建奇功授河  
南汝寧衛指揮使奉命削平寧陽寇勅建都督

府第鎮守之邊隅無警  
卒於官鄉民立廟以祀

謝柱

寧化人洪武初從大軍渡江討陳友諒奉命取  
雲南諸路累功授武畧將軍除青州右護衛指揮

僉事歷陞福建都指揮使賜名玉柱子賜  
受福寧衛中所副千戶希彥散騎舍人



黃萬里

字希鵬連城人洪武間以國子生授監察御史巡馬有異政太祖褒嘉之巡按荆襄貞度肅僚

權奸斂跡  
尋卒於官

張顯宗

字明遠寧化人洪武辛未進士及第第二人授翰林院編修奉勅撰述文字編錄經史遷太常

丞時國子祭酒宋訥卒繼者多不稱旨顯宗以年少署監事尋陞祭酒建文末年以工部侍郎奉命往江西招丁壯募民出粟以禦靖難師事敗謫戍興州旋起交趾左布政使卒於官或云顯宗因靖難募兵被名仰藥發疽死

劉隆

字守庸武平人永樂甲申進士任南昌推官陞河南道御史時太監王金肆虐青田民潘孟吉聚衆

殺之事聞欲盡屠其邑隆奏誅首惡宥其餘民立碑頌德居家置義倉以贍宗族

張永隆

字世昌清流人永樂甲申進士任魯府紀善楊士奇稱其寅畏小心輔導以正正統末沙寇掠

邑永隆在南極山為賊所獲脅之不屈且諭以禍福戒其毋妄殺毋焚掠賊加敬禮遣肩輿載之歸

官謙

長汀人永樂戊子舉人知汝州恭慎慈愛政知緩急先是民多流亡謙四出招撫貸種免役民歡趨

之歸者日以千數廟學傾圮捐俸修治秩滿去吏民思之

余瑤

清流人永樂間由恩貢授知青田縣以廉能清慎著興庠序重農桑設桔槔以救荒旱罷場坑以甦

民困卒於官民祠祀之

張榮

清流人永樂間以監生任衛輝府通判廉能考最張秋河決承檄供事賴以成功擢工部郎中于謙

嘗稱其果慤之才足當方面

李綸字仕彌上杭人永樂乙未進士歷任廣東道御史負氣英果遇事敢言凡所指陳皆詳明剴切巡按

河南疏劾藩府違法事坐忤權要出為江西按察司副使致政歸

周弘

字友毅上杭人永樂辛丑進士初知柘城縣寬恕廉謹邑有治官如家愛民如子之頌斷獄一以平

恕為務每決囚數日後猶忽不樂飲食或因之廢嘗語人曰我豈不知犯者當死特此心惻然自不容

過耳尋擢廣西道御史

陳璉

字廷器連城人以貢授知湖口縣築城建學救災禦寇中賊矢而卒邑人祀之

賴世隆

字德受清流人宣德庚戌進士授翰林院編修有才畧時沙寇鄧茂七作亂世隆疏請征討陳

山川險易進兵方畧朝命寧陽侯懋統師征之因命世隆為導引官招撫延建世隆先領兵千人回汀遂

擒賊首陳美九蔡田等招集延汀散亡十萬餘人後以事忤權要前功竟掩時論惜之

馬馴

字德良長汀人正統乙丑進士授戶部主事遷郎中奉勅總督宣府芻糧悉心區畫省遠輸費三之

一陞四川叅政會蜀寇作亂馴覈已徵未用糧得百萬斛以供軍士賜文綺嘉勞尋陞本省右布政使乙未播州用兵勦寇馴出庫錢糴米供餉寇平勅書褒異陞本省左布政使松藩蠻叛邊將復議用兵馴謂宜以德懷撫力爭不從後兵興無功糜費不可勝計人服其遠識擢都察院右副都御史巡撫湖廣值關中饑民流食荆襄間設策賑卹全活甚衆湖湘尋亦災傷馴奏減歲入民賦在湖湘七年務持大體不事小察未幾謝歸年七十六卒賜祭葬

吳文旭

字景陽連城人以貢授安遠訓導啓迪生徒教規丕振會寇作當道委其勦捕文旭直抵賊巢

諭以大義賊皆感服事聞遷銅鼓衛學教授丁內艱  
歸文旭少從吳與弼遊生平以敬義自持家居二十  
餘年絕跡公門  
年八十餘卒

丘弘

字寬叔上杭人天順甲申進士授戶科給事中成  
化二年淮揚大饑弘奏賑卹之復陳時政十二條

曰畏天戒容直言精選法抑僭奢通錢法息紛爭廣  
儲蓄憫窮民革弊政敦風俗公賞罰飭邊備皆見嘉  
納遷都給事中三年夏地震條上修德弭災七事四  
年因嬖倖求割莊田具奏禁絕之復劾奏張真人不  
法狀尋奉命使  
琉球未出境卒

周璇

字元吉長汀人成化丙戌進士授南兵科都給事  
中奉勅提督軍務操江帶管五軍都督府掌兵部

事忠鯁有聲先是汀解南糧轉輸艱苦成化七年璇  
表上地圖悉陳汀路隘險嶺峻運解艱難狀遂得免

汀人至  
今賴之

童璽

字信之連城人成化庚子舉人授全州同知尋遷高州改廣州力罷佛山鐵課以計靖增城擷寇遷

刑部郎請築連邑城未報適以公事歸省捐貲先築尋遷激江府建城築隄遷學改治平徭弭寇激人德之立祠以祀題碑曰墮淚家居年七十餘而九旬老母尚在焉

葉元玉

字廷璽清流人成化辛丑進士授戶部郎能詩與李夢陽同舍相唱和出守潮州以道義示潮

士潮有少卿吳一貫者元玉同年友也向元玉求灣田灣田為番倭船依棲之穴每開耕必有劫殺久為潮人害元玉執弗與移書責之曰灣田關係地方甚重智者不屑為仁者不忍為不屑為者以求利未得而害已隨不忍為者以利於一已害於衆人公今一子年尚幼穉何必以百年之人為千年之計又云公

方當路於朝當思何以報君何以循分何以功施社稷澤被蒼生以不負吾榜中得人之盛蠅頭微利何足道哉少卿得書大怒元玉遂坐是罷官

李元祥

連城人少敦孝友清苦自勵時掛坑嶂賊犯境元祥首倡捍禦民賴以全後任端州經歷平華

林劇寇棄官歸端人思之從祀宋文天祥祠

林華

字廷輝連城人成化丙午舉人任臨海教諭歷都察院大理寺二司務忤劉瑾降蕪湖教諭科道交

薦其節瑾誅除宿松知縣在官廉惠有聲尋陞刑部員外郎終襄府長史

熊致諒

字克信長汀人成化間以貢補揭陽尉修學宮闢射圃攝篆程鄉值蓬州寇發致諒馳銳卒橫

擊之三戰皆捷賊遁去在任時完繕城郭撫綏士民程邑安堵尋以母老乞歸

賴先

字伯啓永定人弘治庚戌進士以親老乞歸養召拜戶部主事齋邊餉督鈔開收京倉糧清西蜀屯

田悉著賢聲遷員外郎引疾歸起知常德府時修建禁府中官誅求甚峻先痛加裁抑民賴以甦

梁喬

字遷之上杭人弘治壬戌進士授刑部主事嘗與同官疏劾劉瑾不法狀章數上不報喬獨面奏之

武宗怒命下錦衣衛獄喬大呼曰臣得寢闔暨逆謀死且不惜何況於獄乃命枷朝門外久之始釋遷兵

部郎中出守紹興有善政尋以母老乞歸養歲丁丑王守仁以勦寇駐兵上杭題其堂曰愛日

何濬

字通源上杭人正德五年以貢判南康府鄱陽湖漁人九姓積歲為盜以例饋官官受之縱不問濬

至有以千金獻者峻却之嚴行捕緝盜風遂絕歸家僅餘俸數金而已

郝鳳升

字瑞卿長汀人年十三補弟子員正德辛未舉進士授大理評事陞左寺副武宗幸榆林留駕



切諫忤旨下錦衣獄旋出之未幾南巡又與周叙等  
三十六人極諫再下錦衣獄廷杖謫都察院照磨世  
宗嗣位擢嚴州知府甫五月  
多惠政入覲至瓜州以疾歸

李元瑫

字世玉連城人正德八年以貢授袁州訓導郡  
守徐璉命往視寧庶人壽禮畢登舟而宸濠叛  
勒諸教官傳檄元瑫不屈裂冠袍躍入水中  
以救免歸白郡守舉兵應王守仁成討賊功

邱道隆

字懋之上杭人正德甲戌進士知順德縣值歲  
饑立法賑濟多所全活毀淫祠新學舍擢江西

道御史首請逐佛郎機入廣南停浙江織造二事及  
巡山西督河東鹽課疏請開濬古永豐渠建鹽倉處  
屯軍補額課言皆碩畫時分守太監黃玉怙勢逞威  
道隆列罪狀劾之嘉靖初再巡四川又劾分守少監  
閻良會有旨舉用人材凡所疏薦皆一時耆宿風裁  
嚴峻以鯁直觸忌出知南雄府端方持大體僚屬凜

凜奉法常大書畏天憫人  
四字以自警以親老告歸

楊昱

字子晦汀州衛人正德己卯舉人署龍南學事尋  
令朝城操履端嚴布袍蔬食澹如也補知都昌減

偏累民糧歲早祈禱輒應  
致仕歸學者稱東溪先生

鍾鴻

字騰霄武平人以歲貢任上饒丞時懸繩掛坑寇  
亂三省協攻賊平後良民多被誣累鴻挺身為辨

全活甚衆  
年八十卒

陳仁

字體元歸化人嘗從湛若水學嘉靖元年由明經  
授廣西府通判時粵地文教未闢仁至大為闡揚

激勵士類莅民有惠政致仕歸  
以講究性命為事士林宗之

李元泰

字汝嚴連城人嘉靖間以貢授太平訓導值倭  
亂當道延之叅謀遂致克捷尋告歸會饒賊逼

城元泰請推官劉宗彝鎮邑偕其友謝魁竭力贊畫捐貲助餉土寇羅三妹等與賊內通設計擒之隨用火攻平賊又嶺後賊羅袍擁衆萬餘逼城二十里而營當道請元泰督勦晝夜登陴以勞致疾卒

張僖

號鳳山永定人嘉靖戊戌進士授中書科舍人嚴嵩欲羅致之使人諷以美官僖不可上疏劾嵩遂拂袖歸敝廬數椽風雨不蔽怡如也

鄧向榮

字元植自清流徙居長汀嘉靖甲辰進士授戶部主事監督淮運杜絕諸弊以直言忤時謫六安同知轉嘉定州甫二日聞父病遂棄官歸舊業腴者悉推與弟著有正學準則太極通書考惜陰考等

書

鍾天爵

字良貴武平人由明經司理平樂時徭賊猖獗桂梧路梗天爵上平蠻八議當道採用之設昭

平足灘廣運三堡番軍戍守又領兵破賊斬首級千餘署富賀二縣事徭目翟貴進梗化立屯堡八隘團練鄉兵搗勦之昭州以寧

沈玉璋

字九山永定人嘉靖間以貢授海寧簿寧無城郭人鮮知兵玉璋至以職司選捕勤於訓練後

倭寇掠境親率東倉兵捍禦邑賴以全

蕭懋烈

歸化人任鳳陽照磨流寇突至懋烈提兵奮擊無援被執死之子舞鳳同日殉難

黃益純

字健峯永定人嘉靖戊午舉人教授温州擢睢陽令修理學宮均定田畝招流亡八百餘戶給

以牛種墾荒田五百餘頃疏洶河剪除積寇立巡河墩堡節制七十二所屯衛歷任五載乞歸終養

熊纓

字子清長汀人嘉靖間以歲貢授青田丞時倭寇猖獗環海以西剽掠無寧歲纓倡議築城為戰守

計期年城竣倭寇擁衆萬餘突至圍龍津舟山二門  
相持八晝夜纓募勇士宵渡縱火焚其柵以奇兵掩  
擊之倭大潰走青民立祠以祀  
擢山東德府紀善進階二級

伊天祐

字順甫寧化人嘉靖間以歲貢知桃源縣俗尚  
鬼多淫祠有將軍廟香田至百十頃天祐至毀

其像火其宇變其田為修城費華輪寺朔望男女喧  
雜禁之不止一日突輿至寺令僧各負一婦監送歸  
家自是慙悔無有至者邑歲積無碍官錢三千兩留  
為郡守壽吏以例告天祐曰此何言也不雨自天不  
曠自地烏有積金三千兩云無碍  
者竟申請裁之天祐能詩善楷書

賴榮華

上杭人襲職百戶嘉靖甲寅倭寇浙江總戎徵  
兵於閩榮華奉名守禦嘉善縣倭突至枵腹接

戰斬獲數級別將皆觀望自保榮華孤軍衝突為伏  
砲所中墜水死事聞謚忠勇陞副千戶建祠城北祀

之

王溥

清流人以歲貢授知澄邁縣清簡廉介決斷如流澄故有地宜播種而民不知灌溉溥教百姓製小

車運水灌田荒土轉成沃壤田穀歲入無算民德之

裴應章

字元闇清流人隆慶戊辰進士授行人奉使德晉二府陞見奏對進止有度神宗目之擢吏科

給事嘗以事至遼左目覩險隘情形乃畫善後六事條上之悉見嘉納遷兵科都給事值寇勢方張長昂諸酋數入犯應章所奏制馭洞中機宜念邊將玩愒大吏相為欺蔽遂劾罷撫臣之棄師憲臣之昏庸與勲臣之不法將臣之縱賊浚卒者風采肅然江陵張居正當國嘗建議三歲一遣大臣行邊應章言糜費當罷大璫馮保欲取回寺馬三千匹應章議勿與遷太僕少卿所上疏給關防嚴舉劾戒侵剋覈寄養諸

事皆稱旨著為令轉太常正卿議侑享祔葬禮下禮臣報可鄴卒辱撫臣將為亂廷議非應章莫能定奉命馳往未至先檄諭以禍福語甚切至亂卒計窮自縛至數百里外迎應章應章集眾斬其魁餘無所問耶境晏如入為戶部右侍郎請歸養父歿起少宰推穀皆海內賢士晉南司空立法疏錢幣諫採鷹架木糾中貴人濫索省水衡錢甚多尋乞歸復起南太宰累疏懇辭虛席者三年卒謚恭靖有懶雲居士集若

卷干

沈孟化

字觀瀛永定人萬曆甲戌進士令浦江邑無城郭孟化節縮千餘金督民築城擢刑部主事遷

郎中出守湖州值大旱發賑賑平糶存活數萬人別駕龔先進司李周著為當事所齟坐落職孟化毅然曰良吏黜何用守為抗言力爭卒直之時計吏畢集聞其丰采有泣下者歷遷黃叅政稅監橫恣禁戢之

稅監怒以抗旨庇屬聞或諷之求援恬然曰今之求  
援何如始之不櫻坐奪一階左遷廣西副使韋酋煽  
亂劫掠思陵州奉詔勦捕乃調集土兵覈南寧絕田  
千餘畝斥以供軍隨遣裨校捧檄入穴諭以禍福責  
以大義賊大感悟解散餘黨陸佑黃尚負固督重兵  
感之擒黃尚於風門嶺賊衆奔竄遷右江叅政右江  
獍狺時相仇殺出擄掠督指揮朱堯武等往勦斬其  
渠魁百餘峒皆就撫降者數萬人編入堡伍尋以入  
賀卒於秦

和舟中

伍可受

清流人萬歷丁丑進士知容縣度田定賦馳檄  
平岑溪蠻擢南禮科給事中彈劾輔臣許國謫

萬載丞尋起開封府推官遷戶部郎中歷轉山東叅  
議以入賀歸省卒著有博藝堂稿焚餘草謫居草代  
奕吟

諸集



羅尚賓

字晉卿長汀人萬厯已卯領應天鄉薦除武陵令抵邑逢儉歲裁罷一切供費躬巡行賑貸窮

鄉僻壤足跡殆徧按察陳某養子殺人時蔡國珍分部湖北為請不許竟論如法莅任數載治行為三楚

冠遷工部主事命督造清江兼司權政悉罷法外需索商人稱便尋無疾卒福清葉向高銘其墓

劉焜

字允章上杭人萬厯壬午舉人令安陸值旱災流移塞路焜便宜發粟分賑請蠲本年額賦有山寇

王加印彭玉等聚眾為亂監司議發兵焜曰盜本吾民何忍即誅力以撫戢自任捕得賊黨之黠者反覆開諭釋之使招加印加印等感泣盡散其眾未嘗戮一人陞常州府通判盡革權政陋規尋致仕歸門庭

蕭瑟不異諸生時

盧一松

號念潭永定人萬厯間以貢授吉王府教授謂宗藩之學與韋布異乃摘四書中切於修齊治

平者各一條名曰要學三編以進王嘉納之所著  
學道要端井田議化谷議醒心詩宗孔集行於世

劉佐

字鳳南上杭人萬厯間以恩貢知霍邱縣土瘠民  
貧頻年亢旱大別諸山草寇竊發佐撫而戢之境

內寧謚擢南貴州道御史疏救御史魏允貞以言事  
降調為臺班所重奉勅巡視上江督漕糧趙運以時

乞歸日猶舉劾文武  
官數人風裁大著

吳廷雲

號白漚長汀人萬厯庚戌進士知山陰縣捕巨  
寇邵明等二十九人勾東始安築海塘四十五

里溉田萬餘頃以剛介失當路歡調令永新厯南國  
子助教尋擢戶曹出守瓊州革屠牛錢三千餘金捐

柳榔歲課五千金抵解遼餉秩滿遷成龍

兵備尋改高肇以瑤焰告歸累薦不起

揭春高

字晉卿歸化人天啓間以貢判沔陽州時流寇  
出沒無常春高畫守城三策士民恃以無恐攝

篆天門聞寇駐京山嚴戒關吏固守疾馳抵任擐甲登陴捍禦三晝夜賊遁去擢浙川令邑屢被兵火井廬荒燬民多舟居春高為繕城池備器械招集流亡至二千艘河路紆僻亂民乘間劫掠乃密授計守備督兵招捕之凡八日連掃二穴賊以五千騎壓境躬率壯士掩擊三戰皆捷斬獲無算加郎撫監軍同知以勞瘁卒於官

賴華祖

字震南長汀人天啓間任杭州司獄尋陞四川鹽井司大使時張獻忠陷四川前二夕呼姪廷

顯曰我官雖微義不可從賊我死爾當焚我屍負骸歸葬後三日賊至罵賊不屈而死

詹天顏

字隣五永定人崇禎間由歲貢知石泉縣庚辰舉邊才遷慶陽同知士民固留改授本府同知

兼理府事時張獻忠殘破蜀郡過半天顏多設方畧郡賴以全事聞特恩加級

王國佐

清流人習騎射崇禎間巡道朱大典選授副中軍辛未三月流寇數千逼上杭城國佐挺身赴

鬪面帶三矢手執戟格鬪而死

吳奇勳

連城人崇禎間由武舉授京營把總陞漳南道中軍守備奉檄勦猥子山寇陣亡弟希稷亦以

大同參戎戰死蘆溝橋

鄒維勳

清流人崇禎間任肇慶府守備時流寇攻圍韶州奉檄統兵赴援斬首六百餘級賊敗走次日

復進兵追賊伏發力戰陷陣而死兄世斌亦以肇慶把總與賊戰於臨武田螺村陣亡

唐夔

長汀人崇禎間以明經恩賜進士授沅陵令沅陵地接楚黔為用武重地夔撫循得民心民號為佛

子陞戶部主事因亂留治所民爭迎傳殮及歸清素不改卒年八十五

國朝

黎士弘

字媿曾長汀人順治甲午順天舉人授廣信司理兩主計典受十三郡讞牘脫無罪數百人時

為語曰遇黎則生屬邑玉山當兵燹後城中草深三尺居民止三十餘家士弘招集流亡立學建治民復舊業以裁缺補知永新縣革弊鋤奸與民休息擢甘州司馬遷守常州時吳逆煽亂西秦震動擢洮岷副使署甘山道事提督王某叛諸鎮會勦士弘以河東失守鎮兵雲集必事權歸一乃濟主議請授張提督為靖逆將軍節制諸鎮及復蘭州攝署臬篆贊畫軍機判理刑獄分別失陷官吏情輕重悉當會寧夏營弁謀逆殺提帥改授寧夏以安反側士弘嚴守禦以待鎮兵又密請免衛所逋糧七萬五千石寇平叙功陞布政司叅政以母老乞歸卒年八十著有托素齋詩文集

黎士毅

字道存長汀人順治乙未以拔貢入京試第一授南昌縣邑為水陸交衝舊糧溢額民苦輸將

士毅力為請命竟得題蠲山賊彭某以偽劄煽惑村  
民士毅督兵勦滅渠魁授首遷知壽州鎮陽關奸徒  
把持行市盜賊出沒無常至則平物價嚴保甲弭盜  
安民民始帖席尋解組歸年七十七卒於家著有寶

稽堂  
詩集

黃日煥

字愧莪永定人順治辛丑進士知興業縣革里  
甲常規禁包收濫派之弊裕鹽課罷墟稅鄰邑

妖寇犯境日煥親率鄉民斬馘數千尋以憂歸補知  
甘泉邑遭亂後民多流亡丁糧賠累日煥申請豁免  
擢知邳州築隄治河度地建城  
民獲安居擢淮安河務同知

羅文舉

永定人初任廣東千總累立戰功擢廣西梧州  
守備康熙十四年寇犯藤縣奉調應援奮勇殺

賊陷陣死事聞 贈官  
子祭葬官其子一人

### 福寧府

### 唐

薛令之

字珍君福安人神龍二年進士入閩登第自令之始開元中遷右庶子與賀知章並侍東宮積

歲不移遂謝病歸肅宗立以舊恩召之而令之已卒因勅其鄉曰廉鄉水曰廉溪著有明月先生集孫芳杜清簡寡慾英明有斷鄉人爭訟得芳杜一言即帖服肅宗嘗召之辭不赴或云今之弟子

林嵩

字降神福寧人乾符二年進士除祕書省正字轉度支使在軍旅不忘俎豆後除毛詩博士官至金

州刺史善詞賦  
載唐書藝文志

**黃岳** 福寧人博通典籍尤精易象太極歷數之學以鄉貢入太學時黃巢入閩避亂者多就岳以資衣食

乾寧中王審知累辟不就及審知僭號度不免遂投淵死

宋

**周希吉**

字信叔福寧人端拱元年進士收辰州蠻有功除著作郎歷秘書知蓬州政蹟昭著兩被璽書

獎諭終朝請大夫

**丘允**

字執中福寧人元符三年進士授欒城尉時採砲石軍多暴橫允申明法令軍遂戢擢知臨湘三日

平反冤獄五十餘人太守鞏璘喜曰令皆如此天下何憂不治調知鄧城除官府買絹之害移知新建有黃冠恃勢凌人允嚴治之黃冠訴於朝大臣欲罪之徽宗曰愛民之吏罪之曷勸遷知柳州疏鹽課之弊



朝廷下其法於兩廣南渡後召對請上稽天意內勤政事任賢遠奸克儉邦家無或豫怠高宗嘉納之除知惠州楚巫祠開藥局致仕卒贈朝議大夫

楊惇禮

字穆仲福寧人崇寧五年進士授興國軍司法轉太學博士時與鄉人黃薦可林介卿並命有

北鄉三博之語出判秀州建炎元年以監察御史名與趙鼎黎確沈與求同命力辭歸許在家言事子績字偉明以通迪郎賜緋致仕

阮大成

字希聖寧德人政和初為國子上舍靖康間李綱斥罷大成與陳東等伏闕上書乞復用綱朝

廷納之後為韓世忠客退隱於家世忠平建寇范汝為道經寧德造大成廬訪焉

劉現

字明之福安人舉賢良宣和二年伏闕上書言外寇猖獗而王黼梁師成之徒不恤國難肆其奸貪

請罷斥以謝天下不報三年陳過庭張汝霖以直言為黼所劾又上書力爭之亦不報遂拂袖歸後屢徵起不

**陳最**

字季常福安人宣和三年進士調新昌丞會抗卒叛最單騎諭之皆解散召對稱旨帝諭宰執曰陳

最人物可愛議論可取授諸司糧料院鄭剛中使川陝與金人分畫地界最副之金使賀景仁子也屢與最爭最責之曰而父受本朝大恩何乃若是金使氣沮卒從所議以力阻秦檜和議出知興國軍

**劉季裴**

字少度福安人紹興十八年進士歷秘書丞監察御史終朝散郎祕閣修撰乾道間進十論中

一篇論何承矩屯田規畫甚詳孝宗方欲行兩淮屯田事大見稱賞上殿奏事笏偶墮膝行拾笏碎遂奏言今日之事有不可缺者即如此笏孝宗曰季裴膽大如身每經筵顧問所對皆稱旨著有論孟周易

解頤齋遺稿  
四川形勢論

林珣

字德潤福寧人紹興中詔求直言珣上砭石論四十七篇尋召對進三劄高宗面諭云前見砭石論

今復見此劄知卿忠義不減唐馬周也  
歷知無錫宣城以薦知太平州

王定國

字安卿福安人紹興中叩閤上邊宜十策高宗幸金陵復條十五事命從趙瑞招撫山東張浚

留置幕下時海州為紅巾所據定國與魏勝收復之攝判官兼州事隆興間陳敏知高郵辟定國為判協力守城與金兵九十三戰皆捷孝宗大悅特創高郵軍簽判以處之孝宗謂大臣曰王定國忠義勇畧真英士也仕終朝奉大夫

張觀

字達之福安人紹興中入太學金人渝盟觀率同舍生七十二人上書請斬湯思退王之望尹檣竄

其黨洪适昆公武而用陳康伯胡銓等以濟大計言甚切直仕終新城令

林湜

字正甫福寧人紹興三十年進士調富陽尉嘗部勒弓手截金亮之黨擒鹽徒之行劫者改知晉江

判南劍州州守議請官自買酒湜力爭不肯署名遂格不行除監察御史疏言陛下托股肱於宰執而所任皆小人寄耳目於臺諫而彈擊皆君子治亂之大無過於是出為江西轉運判官厯太府司農卿權貴側目韓侂胄讐逐正士呂祖儉上書爭之貶嶺外湜見時宰曰呂子約南行執奏收回大臣責也力請外除湖北轉運副使進直龍圖閣致仕朱熹被斥士皆遠嫌湜獨執弟子禮不變未歿前數月猶馳書問疑

義卒年七十

一著槃隱集

楊興宗

字似之惇禮孫紹興三十年進士調鉛山簿孝宗登極上封事陳以守為攻之策召赴都堂湯

思退方主和議使御史尹穡要之曰登對願無立異當以美職相處興宗力爭和議非便思退大怒孝宗嘉其志除博士召對言兵冗切中時弊復充館職遷校書郎與林光朝同校文省殿擢鄭僑蔡幼學陳傅良等時稱得人遷尚書司勳郎論張說不當與趙汝愚同拜不報又以封爵太濫不肯書勳忤時宰乞祠出守處州改湖廣提舉有自觀文集

高曇

字子雲福寧人紹興三十年進士隆興中為太學博士疏言訓練兵士久任將帥孝宗嘉納遷秘書

省著作郎再對便殿既出帝目送及門駕乃起光宗在儲宮以宮僚入宴恩意浹洽手書容齋二字以賜嘗修乾道會要有易說及詩文二十卷從孫松字國楹從陳傅良遊以進士授台州教授訓迪有方葉水心銘其墓

高準

字平一寧德人隆興初以上舍陞國學適湯思退

主和議準與太學生張觀等伏闕上書乞斬賊臣  
不報乾道間虞允文當國準獻東南銷患書一卷因  
請入北庭伺虛實凡山川道里形勢強弱悉錄以獻  
并言恢復大要時允文已去國朝廷欲官之準曰所  
以効命於虞相者為九廟陵寢非為身謀也竟歸杜

出門不出

陳駿

字敏仲寧德人乾道五年進士為大冶丞從遊朱  
熹之門著論語孟子筆義又著毛詩筆義為鄭思

孟諸賢所宗  
號仁齋先生

林維屏

字邦援福寧人少力學通性命之音淳熙間梁  
克家知福州延講郡庠學者雲集著易本論六

十四卦論洪範論三頌論封建藩鎮正統五霸春秋  
等論韓柳辨疑莊子內篇及語錄諸書學者稱為榕

臺先生

楊復

字志仁福寧人得朱熹之正傳與黃幹劉子淵陳日湖友善真德秀帥閩嘗創貴德堂於郡學以處

之學者稱為信齋先生著祭禮十四卷儀禮圖十四帙又有家禮雜說附注二卷

楊揖

字通老福寧人淳熙五年進士與楊方楊簡俱朱熹高弟調莆田尉閩帥程叔達移縣括田揖歷

疏其不便叔達怒漕使林祈謂叔達曰以一尉敢與帥忤大是奇事遂薦之累官司農寺簿劄論進君子退小人勿徇左右之請以重中書之權語多風厲轉少卿臺臣或干以私不應尋出知安慶終朝散郎著奏議悅堂集

鄭思孟

字齊卿福寧人家貧力學六經注疏手自抄錄從朱熹遊黃幹妻以女著洪範講義發明皇極

之蘊號存齋先生

黃幹字尚質福寧人朱熹門人著述甚富餘千饒魯寧德李鑑皆從之遊所著有誨鑑語五經講義四書

記聞官至直學士

余復字子叔寧德人少從張翰學精於周官紹熙初策士大廷光宗覽復對曰余復直而不訐擢第一賜

之詩寧宗即位詔入史館兼實錄檢討歸闕園邑南著禮記圖說

林仲麟字景冲寧德人紹熙中試太學第一以忠鯁著名慶元間趙汝愚以讒被貶仲麟同楊宏中等

六人伏闕疏救編管毘陵時稱慶元六君子嘉定戊辰奉旨褒錄官終廣東都府叅軍弟仲虎慶元中武舉魁廷試開禧間副禮部侍郎李璧充賀金生辰使以風節著金人攻和州仲虎集强弩千餘人擊却之



著有百將傳  
出疆唱酬集

趙萬年

字方叔福安人慶元丙辰武舉為襄陽制置司幹辦開禧二年金人圍襄陽諸帥司相繼遁萬

年繕兵峙糧力贊招撫使趙淳為死守計為書反間金帥夜出壯士三千人據大望山絕金人糧道相拒九十餘日金人遁去以功進武德大夫有守城錄裨幄集魏了翁為之序

黃沐之

福寧人慶元二年進士授義烏尉賊有鐵彈子者負險剽掠沐之躬擣其穴縛以歸州守檄視

民田議加賦沐之力爭之得減十之七陞知上杭去之日不持一錢調知麗水邑賦役不均下戶多不堪命沐之清其源流立程式以垂永久邑民頌之尋卒於官

高頤

字元齡寧德人慶元五年進士知東安縣莅官臨民卓然有聲嘗曰吾身任大責重無天地生物之

功而有其心無經國子民之位而有其志又曰學者求為聖賢非僅讀書作文求仕進而已著有雞窓叢

覽百五十卷詩

經傳解三十卷

張泳

字潛夫福安人有志濂洛之學慶元中偽學禁嚴會大比試天下之言性論有司讀其文歎為冠場

策問偽學詠詆誹邪說力主朱熹正學主司賢之學者稱墨莊先生有文集祀福州養正書院

王伯大

字幼學福寧人嘉定七年進士授國子學正歷知臨江軍歲饑置荒政局詳求古今賑濟法第

甲乙丙丁戶作紅黃白黑園別識之全活甚衆端平中上疏極言逸欲敗德戚宦近習撓政朋奸誤國之弊又極言邊事曲盡事情以直顯謨閣知婺州莆人方大琮上丞相李宗勉書云使王伯大立朝似有淮南寢謀氣象朝廷豈不能留一骨鯁之臣以自壯乎淳祐八年除叅知政事尋以資政殿學士知建寧府

寶祐元年卒謚忠文著有  
四留堂銘韓昌黎集音釋

**李鑑**

字汝明寧德人嘉定十年進士官終廣東提舉初從黃幹楊復遊得聞敬義之旨歸與龔剡創六經

講社推明師說誘逸後進居官平易近民曉暢兵事嘗督捕贛寇提兵深入梅州界擒陳羅二賊後梅寇

猖獗授以州符賊憚其威名遁去及莅廣值兩浙大饑鑑運米千艘以賑之著有鳴和集

**龔郊**

字曇伯福寧人嘉定十三年特奏名幼從朱熹學一意躬行不務口耳晚與同門楊復論性理先後

之說尤見精詣有詩文雜著數卷

**孫調**

字和卿福寧人私淑朱熹之學以排擯佛老推明聖經為本著策府五十卷易詩書解中庸發題共

五十卷浩齋稿三卷

林子雲

字質夫福安人寶慶二年進士除融州教授潛心理學躬行實體著有易說十卷

鄭寀

字載伯福安人紹定二年進士任殿中侍御史上正名器疏遷左諫議大夫端明殿學士以御史陳

求魯論罷提舉洞霄宮淳祐五年福安新開縣治寀以詩秦理宗題扇以賜又書北山澄菴賜之

孫翼鳳

字昭瑞福寧人初入太學時史嵩之以父憂謀起復翼鳳率同舍生黃伯愷金九萬等同攻之

又斥和議之非言甚剴切與兄附鳳同登紹定五年進士累官御史大夫立朝數十年以民物為己責以諫諍為己任時政多所裨益卒贈太師

陳贊

字成甫福安人寶祐元年進士由湘潭尉轉工部架閣時史嵩之賈似道相繼用事朝士多竄逐贊

面折廷諍執政忌之遂乞歸

倪文一

字元芳福安人咸淳四年進士授安仁尉鄰境

致幕下有疑獄輒委獄杖滿遷  
知清流入元隱居不起以壽終

高伯堦

字汝諧寧德人領鄉薦留心關洛之學著有一  
得錄禮記遺說左氏纂類會粹古今事類二百

卷集關洛諸儒語  
為傳心直指十卷

陳普

字尚德寧德人學者稱石堂先生宋季從會稽韓  
恂齋學派出輔氏而以朱子為宗倡明道學四方

來學者數百人嘗聘主建莊書院元初聘本省教授  
自以為宋遺民不就晚居莆田十八年精聲律天文  
地理算數之學著四書句解鈐鍵學庸旨要孟子纂  
圖四書五經講義書傳補遺易經解注易說渾天儀  
論天象賦咏史詩  
斷凡二十二卷

謝翺

字臯羽，鑰子。福安人。徙居浦城。試進士，不第。落魄，

勤王。長揖軍門，遂參軍事。及天祥死，翺隻影行兩浙。逢山川池榭風雲竹木徘徊，顧盼失聲。哭時涼秋風急，扶酒登子陵臺。設天祥木主，荒亭隅酌。酒南望，慟哭以竹如意擊石作楚些，招之曰：「魂歸來兮，何極！」魂暮返兮，關水黑化為朱鳥。今有味焉，食歌罷，歎戲。慷慨竹石俱碎，又時時往來鴈山蛟門。天姥四明間與方鳳、吳思齊、友善，自製哀江南四章。酒後顧影長歌，咨嗟欲絕。每執筆為詩，文瞑目遐思，與天地俱忘。自號晞髮子。至元甲午，家武林西湖上，以肺疾卒。語其妻曰：「吾去鄉千里，交遊唯方韶、吳子善最親，可收吾文及吾骨，授之葬我。必於許劍之地。後葬於子陵臺南，以詩文殉。有許劍錄晞髮集行世。」

元

王都中

字邦翰福寧人年十七授平江路治中除浙江宣慰副使金華有毆殺人者吏受賕以為病死

都中覆按得實長吏而下皆以贓敗改郴州路總管溪峒徭獠往來強猾都中恩煦而威攝之咸悅服郴沿蠻俗都中治學舍作籩豆笙瑟之屬使習禮樂之器延宿儒化導之曉以義理俗乃丕變轉饒州路總管年饑米價翔踊都中發官倉米定下價民喜得食時宰惡其專擅都中曰饒去杭幾二千里比議往還非半月不可人七日不食則死安能待乎民僉言公活我輩果得罪我輩當鬻妻子以代公償時宰聞之乃罷復除兩浙鹽運使遷福建宣慰使改浙東以疾歸順帝時拜浙江省叅知政事卒贈太師諡清獻元時南人以政事之名聞天下而位登省憲惟都中一人而已

陳天錫

字載之以文學授本州學正改泉州造大成樂鑄禮器率以法度遷建陽尹以興學崇化為先

秩滿知福清州以壽卒著有鳴琴集子五人陽至陽盈陽復陽純陽極俱有才名有棣萼集

陳陽盈

字子謙累官侯官尉調泉州稅課副使至正十二年寇攻州知州王伯顏檄陽盈率民兵拒敵

奮身陷陣賊脅之降陽盈執大義罵賊遂與義士湯成順同遇害事聞贈敦武校尉

明

陳宗億

字任達福安人洪武初舉孝廉授荊州知府地多水旱宗億為之備隄防開溝渠築砌秦川臺

口石路及長堤以衛水患名其堤曰陳公堤

陳錡

字器之福安人洪武癸酉舉人擢山西道監察御史永樂間監軍甘肅號令嚴明賊寇猖獗錡奮身

拒戰孤軍不支被執罵賊甚厲賊怒殺之事聞成祖為流涕曰忠臣也



蕭顯

字思允福安人永樂甲申進士選庶吉士改工科給事中從朱能張輔征交趾攻眉盤江命顯撫之

顯單車造壘宣諭衆感悟納款調知峽山考滿民赴闕乞留詔仍治峽前後一十八載宣德丁未交人復

叛又詔知連山九載乞歸卒之日篋惟敝衣舊帶而已

陳琦

字公刻福安人永樂壬辰進士累官江西按察使僉事通敏平恕行部至筠值大旱引咎自責齋沐

致禱甘雨隨注一日坐堂上見一大蛇翹首若有所訴琦異之令人窺所向得古井遺屍乃張甲妻通李

乙因與乙殺甲棄井中者捕至服罪筠人以為神

孫賦

字國用福安人正統間以監生知龍川輕徭薄斂重農勸學數載間增墾田三百餘石奏蠲屯田賠

徵米五百餘石黃蕭養亂賦悉心捍禦招集流亡上下倚之秩滿致仕

林聰

字季聰寧德人正統己未進士擢刑科給事中景泰元年轉都給事與同官葉盛彈劾切近內侍及

當柄大臣不法狀遷春坊司直大學生商輅言六科不可無聰仍補吏科都給事戶部侍郎張睿國子祭酒劉鉉並以母喪奪情聰上疏侍郎六卿之亞祭酒師儒之宗忠孝大節不可少欠乞命依例守制不聽英宗復辟超遷左僉都御史捕江淮鹽寇殲其渠魁曹欽反誅繫多人聰辨明黨與無一寃濫成化間江淮大饑奏借江南糧及支運糧數十萬賑給進右都御史巡撫大同以疾乞歸越三年召掌南京都察院事入為刑部尚書加太子少保懇疏乞休不允卒贈少保謚莊敏有奏議八卷見菴文集十四卷

卓越

字彥林福寧人臨產時其母臥室有聲驚疑他徙已室後山崩壞室裂石有文曰卓越母喜因名之

景泰庚午舉鄉薦知永嘉縣廉而能幹事上不阿提舉市舶中貴至縣索市貨越抑其爪牙中貴召越將

答之越佯解衣受笞而臺隸皆永嘉人先受越誠各鼠竄越於是堪中貴胃過之幾死中貴不勝痛諄服請盟盟定乃各更衣冠備賓主之禮而出不能取永嘉一物改知金鄉邑人祠祀之

張萬紀

字汝守福寧人慷慨有大志初授桐山千總每設計捕賊賊黨盡獲晉大寧叅戎累立奇功轉

惠潮副帥蠻黎為梗當事檄討之萬紀力戰中流矢歿時有天雞乍鳴海日橫出之喻

左濬

字希哲寧德人成化戊子舉人初授餘干訓導謹身立教却餽周貧遷知仁化縣興學善俗愛民節

費鄰境寇起率兵擊却之調知高要邑當兩廣之衝供給旁午事集而民不擾用節而上不疑既乞歸以薦起判惠州躬擣賊巢討平巨寇復以親老告歸家無餘貲陳獻章為詩贈之

陳寓

字時安寧德人成化己丑進士知休寧縣搜剔吏蠹一言折獄遷南京刑部郎有死囚越獄衆為危

之寓方著失囚解以見意頃獲囚囚叩頭祈死寓聲  
色安和勉使就獄及囚臨決越衆拜謝而後就刑擢  
廣西按察副使所至苗獠避伏古田寇發殲其魁  
渠進山西按察使以忤權貴九載不遷卒於官

林文迪

字廷吉寧德人弘治壬子鄉試第一乙丑進士  
授刑科給事中遇事敢言奉命清糧卒於廣西

文迪性敏質粹學博

識醇著有五峰遺稿

林遂

字元成福寧人正德甲戌進士授南京大理寺副  
嘉靖初陳八事曰恒敬心遠邪安容戇直公是非

重守令謹刑罰修武備革弊俗帝嘉納之擢湖廣按  
察僉事請以太和山香價賑襄沔饑民全活萬餘人  
除鄖陽部運徵賠之害革柳永老女不嫁之俗進四  
川副使平酉陽之亂歲旱饑檄郡縣各修學校或謂  
不可曰此范文正遺意也後麥大熟長至丈巡撫將  
以瑞進遂謂大寒之後必有陽春何足為瑞獨不署

名陞貴州叅政致仕家居囊無餘貲至脫室人冠帔市米以給饋粥著有石壁集

陳任

字司重福寧人通曉星象兵法嘗驚產以遷州學嘉靖初以貢司訓萍鄉有徭戶貧甚驚子完役任

知之還其金俾贖子歸且復其役有廣為投文者入縣庭露刃馳上知縣秦吉踰垣走帑金被劫任率健

士掩捕之獲七賊擢城武教諭愛士恤民以清節著

陳褻

字邦進寧德人嘉靖癸未進士選侍御史劾胡侍郎提督大同逗留疏立獻廟巡按江西夏言為相

欲毀民居以益苑園書以諷之左遷韶州推官復謫判泗州久之為慈谿令毀淫祠以祠吳相關澤唐相房瑄之有功德於慈者陞廣西兵備有平獍賊功尋致仕著禮記正蒙騶山集行世

周璞

字懷玉福寧人嘉靖乙酉舉人判廣州覈番船悉絕其賂陞上思知州尋擢思恩知府值岑猛黨呂

馬聚衆為患璞守禦旬月馬遂降納金卻之  
俄乞歸著一石摘稿與弟珉同以孝友稱

盛繼

字朝喜福寧人嘉靖間以貢司訓遂昌遷興寧教諭縣令憫其貧以罰贖百金為贖峻却之至興寧

值處州峒酋為梗繼單車諭降之轉國子助教以母老乞歸著有舒藤稿明禋稿

黃釗

字珍夫福寧人嘉靖丁酉舉人任温州同知乙卯冬倭寇犯溫釗奉檄擊之賊稍引去或曰胡不亟

追釗曰吾非畏死以未得勝算也自是集部兵訓練之丙辰倭自福寧向溫釗發兵拒戰於水北洲身先士卒賊伏四起官軍潰同事者欲遁釗怒把其袂曰吾黨官屬寧同卒伍耶乃自麾兵抗賊賊支解之事聞贈右叅議廕子立祠著有墮蕉錄

陳良謙

字德益福寧人嘉靖癸卯舉人令安義勤撫字以戇直忤當道調會同治巨惡不少假盜賊屏

息去之日民  
立祠祀之

林愛民

字子之福寧人嘉靖甲辰進士初授戶部主事三餉邊疆談形勝如指掌權稅潯陽舟至無不

即渡關者關令救溺貨有賞愛民令救人者賞倍之尋管銀藏時羽士方有寵歲費香金十七萬權闖欲發老庫銀給之力持不可曰老庫備非常非奉旨誰敢發者以忤大司農謫興國州同知嘉興值倭變守北樓四十日築桐鄉城工成而寇至賴以不破再判保定均驛馬政擢廣東僉事散珠盜百餘艘以忤部使者歸著有肖雲稿

郭文周

字景復福安人嘉靖甲辰進士授中書舍人擢雲南道御史監蘆溝橋稅及印馬南畿秋毫不

入私橐出按廣東豪猾皆據法繩之不少假民呼為鐵面青天著有臺中奏議按粵封事觀風漫興東山

集行世

游朴

字太初福寧人萬厯甲戌進士歷陞刑部郎中三  
主法司無一冤獄再遷湖廣叅政分守承天發大

豪李天榮不法事論死竟以是投劾歸性孝友與弟  
韶白首同居著楠山社草浙江讞書藏山集行世

陳勗

字世勉寧德人萬厯甲戌進士授餘姚知縣餘姚  
繁邑簿書如山勗頃刻立剖諸當道有曲法相屬

者不少徇遷廣東叅政將吏獲海上愚民輒誣以大  
盜株連數百人勗面鞫其偽盡釋之調廣西副使治  
兵左江是時川貴會征播酋楊應龍勗簡兵數千人  
往援大破之川貴總督疏其事會皮林蠻反遂晉勗  
監軍叅政協勗乃率衆三萬人生擒苗首撫降  
萬計以冒暑深入積勞而卒賜祭贈太僕寺卿

張大光

字叔焱福寧人萬厯乙酉領順天鄉薦授廣東  
長樂縣尋判饒州以督造進御磁器忤權璫遷



知普安州逾年乞休父老釀金追送詩以卻之有陶  
潛有酒開三徑劉寵何功受一錢句歸築南山敝廬  
臨終前五日作詩文馳告  
親友至期衣冠兀坐而逝

崔世名

字徵仲福寧人領萬歷己酉鄉薦任巴陵令以  
忤璫削籍歸尋擢浙江運副再擢連州守州多

徭寇世名濟以德威徭  
衆弭伏未幾致仕歸

吳國華

字朝賓寧德人萬歷丙辰進士授行人司陞兵  
科給事中時閹豎竊柄朝士多以直言受慘禍

國華感憤上疏直糾權璫朝右為之動色  
璫怒矯旨削職歸杜門卻掃天啓七年卒

劉中藻

字薦叔福安人崇禎庚辰進士授行人明亡中  
藻正衣冠坐廳事吞金不死復自縊同邑舉人

繆士珣  
亦死之

國朝

陳名蟠

字念齋福寧人康熙丙午舉人授四川汶上令邑當蹂躪之後民無寧宇名蟠多方撫輯民免

流亡宥中山邪圃地隸汶川而徭冒威州年久逋賦乃按籍得三百戶力請大吏徭隨田派籍乃定以內艱歸補辰沅令革除積弊擢戶部陝西司主事歷刑部郎中出守真定署井涇道正己率屬風裁卓然以勞卒於官士民思之立祠以祀

葉有挺

字貞夫壽寧人康熙庚戌進士十三年耿精忠變作有挺竄入南昌明年從間道歸省母逆黨

逼脅有挺泣告母曰兒不得長侍膝下矣遂走山中絕粒死

臺灣府

本府於康熙二十三年新隸版圖文教初宣山川英傑不日自當接踵而出尚俟後

日輯  
入

永春州

宋

蘇欽字伯承德化人後徙仙遊第宣和六年進士除江  
西帥屬值贛卒叛欽畫策平之擢守巴州高宗諭  
之曰巴去朝廷甚遠卿務鎮靜存撫百姓欽對曰臣  
當宣布朝廷寬大之恩上首肯之州舊例有脚家錢  
三千緡欽悉封還代民輸賦改知閬州首陳利病六  
事復卻例錢除利州路轉運判官時吳璘屯重兵於  
興元深加敬愛饋遺甚厚又條時政五事上之卒於  
官所著有兩漢提要十卷子洗以欽廕補官為趙汝  
愚張棻所重厯知雷州秩滿百姓歡迎歌曰蘇使君  
來何晚使我夜不寐朝不飯尋移封州首請減放丁

米及經制無額之徵改辰州致仕從姪總龜授  
衡州教授歷廣南提舉有論語解詩文雜著

陳知柔

字體仁永春州人紹興十二年進士授台州判  
官郡獲海寇有被誣者知柔辨釋四十餘人知

柔與秦檜子嬉同榜檜當軸前列十餘人俱以攀援  
致通顯知柔獨不阿附以故齟齬雅好山水自天台  
至會稽就其巖壑罷知賀州復留惠陽所著有易本  
旨十六卷大傳二卷易圖一卷春秋議例十二卷詩  
話五卷又有梅青傳詩騷古賦雜著古學并圖  
二卷詩聲譜二卷論語後傳十卷皆行於世

蔡茲

字光烈永春州人先以明經領鄉薦紹興二年為  
建州貢院考官謂人曰吾取中一生策三篇皆欲

為朝廷措置大事他日必非常人乃朱熹也其藻鑑  
如此後以詞賦第十二年進士仕至南恩守秩滿有  
林泉之想時梁克家當軸除茲  
廣德憲控辭甚力遂掛冠歸

陳景魏

知柔從孫以恩廕歷監贛州石城寇竊發景魏請乘機掩捕破賊寨擒其酋餘黨悉平辟新會

丞改知潮陽縣歲輸丁銀至郡例增耗曰錠頭錢景魏裁之及解去郡守索錠頭錢例械邑吏欲治之景魏曰令裁之令當罪守乃釋吏尋歷提轄文思院擢知惠州兵火之後歲復荒歉上言民瘵未瘳得減惠陽糴米三之一擢知潮州後知英德卒

黃偉

字維之永春州人紹興二十七年進士除太學錄遷國子監簿時孝宗銳意武事獻議者乞立武賢

良下館學集議偉奮筆草疏謂賢良求文武全才不宜立武科事遂寢或請經義專尚注疏賦論策宜更其體復下監學議偉議大畧謂科舉之法不當變但時文之弊不可不救孝宗深然之除大理丞差知邵武軍陞辭賜對論選用大臣當如王素對仁宗言宦官官妾不識其名者方可充選又論乾道新書不當

刪減內侍不得干預朝政等事孝宗面加褒諭歷官江西提學後居閒十年手不釋卷嘗與朱熹講學自號竹坡居士子以寧以簡以大從子以翼皆有名

留正

字仲至永春州人紹興三十年進士初授陽江尉宰相虞允文奇之薦於孝宗承顧問對祖宗以天下全力用於西夏承平日久邊不為備至敵人長驅殺人而不能支今當改轍使文武並用擢起居舍人尋以顯謨閣直學士為四川制置使乾道初羌酋奴兒結越九渡河內侵正授方畧盡俘其黨進敷文閣學士拜右丞相孝宗謂太子曰留正純誠可託光宗受禪姜特立以隨龍恩擢知閣門正列其招權預政狀乞斥逐孝宗聞之曰真宰相也進左丞相引趙汝愚共政李端友以椒房親詔除郎正繳還之姜特立除為浙東副總管正奏言陛下聽邪人把定之說不顧是非言路塞則萬幾壞非所以愛宗社乞歸田里

不許拜少傅封魯國公嘉王即位進少保奏言陛下  
勉徇羣情以登大寶當示天下以不得已之意實非  
頒爵之時韓侂胄寔謀預政數詣都堂正使省吏諭  
之曰此非知閣日往來之地侂胄怒尋落職嘉泰元  
年進封魏國公卒贈太師謚忠宣有詩文奏  
議外制二十卷子泰端孫元剛俱有才畧

陳樸

字端行知柔從子乾道五年進士歷知漳州節浮  
費五萬為民代輸身丁以左司郎接伴金使舟行

大江中流風暴作金使駭汗樸笑傲自若曰此天所  
以限南北者守疆息民則天福之江有神不可欺也  
使者悚然擢太常卿除知廣州兼廣東安撫革弊例  
帑羨受代儲錢數十萬上於朝弟模字中行慶元二  
年進士以學行召試館職時方開邊模對策謂王恢  
首謀之戮不足以贖僵尸百萬之冤叅政李璧讀之  
嘉嘆後通判鎮江府改知梅州民為立祠改汀州卒  
有經史管窺行世次兄機長於詩尤以易學著模子

晉接紹定進士  
官國子司業

莊夏

字子禮永春州人家貧少孤從兄晦學登淳熙八年進士慶元六年早詔求言夏時知興國縣上封

事言今威福下移此陰勝也陛下宜體陽剛之德使後宮戚畹內省黃門思不出位此抑陰助陽之術也  
召為太常博士遷國子博士歷兵部侍郎輪對首陳  
邊釁不可妄開議者難之又言戰守不成規模不定  
則和好之說得乘間而入今日之患莫大於冗兵乞  
下將帥令老弱以子弟強壯者補入忤柄國者意遂  
累疏乞休自號藻齋老人所著有禮記解遺文二十  
卷國史大事記十帙典故備志五帙子夢閣新成宰  
夢序大理正孫七人彌邵知安吉有惠愛  
彌堅進士編修彌大刑部郎中彌明進士

陳一新

字又之永春州人紹熙元年進士少受學於陳  
知柔志行迴出流輩為汀州教授慶元四年較



藝漕闡時韓侂胄用事首發策以谷永攻君而黨王氏劉蕡言直而有司不取為問同列請易之一新不聽果激侂胄怒將罪之侍臣力救得免累遷國子博士輪對深論權倖以劾免通判婺州知邵武軍以廉平稱卒於官著有奏劄論議詩詞雜文藏於家

陳易

字緩之永春州人慶元二年進士從朱熹學熹嘗稱易及陳淳為學頗得次第或問熹延平驗中於

未發之前是何氣象易曰持守良久亦自可見仕終懷安丞居喪叅酌古禮鄉間化之著有語孟解

鄭輪

字景行德化人嘉泰二年進士尉保昌遷龍南令邑上鄉隣山峒民舊不輸租一日數十輩以長鎗

挈錢而至吏詰之曰聞有好長官願為王民知南城縣盜發諸邑擾動輪悉意拊循無一附賊者歷廣東

主管文字  
知循州卒

明

顏隆

字文盛永春州人以貢入太學正統元年授江西吉安府推官廉明有威少師楊士奇之子犯法執

而罪之當道交薦於朝擢河南按察司僉事流寇深入統師捍禦民賴以安景泰初致仕年八十二卒

田頊

字希古大田人正德辛巳進士授戶部主事權稅九江還改兵禮二部郎中與張治廖道南輩以文

章相砥礪陞督學湖廣僉事至則闢濂溪書院講性命經濟之學遷貴州副使以母老乞歸養撫按交章薦之不起居家三十年絕跡城府流賊掠城頊出私財募死士環守賊遁邑人德之

田濡

字伯潤大田人正德間授處州衛經歷時駕南巡逆彬之使者多所邀求衛無以應擬釀金饋使者

濡厲聲曰忤使者棄吾官耳科歛貧民何為後遭繼母喪徒步歸血流至脛哀瘠而卒

田一僑

字德萬大田人隆慶戊辰會試第一授編修奉使淮藩還充經筵起居官修累朝實錄進修撰

侍讀管制誥萬厯丁丑張居正方奪情輒矯旨杖諫官箝制天下同官趙用賢吳中行二人與焉一僑與趙志臯謀抗疏論救時王錫爵視院篆戒以母累聖德姑過張所諷勸之於是錫爵偕志臯一僑及張位習孔教詣張所首為杖者解張默不應一僑等奮氣昌言責以綱常大義且曰天地鬼神其可欺乎天下萬世之口可盡箝乎語峻直甚張慙憤無地顧左右欲引佩刀自裁一僑等大笑拂衣出張大恨於是志臯孔教被逐而一僑錫爵先期告歸無何張敗起故官同修大明會典數日復引疾歸久之以宮僚攝司成事居二年召修玉牒擢國子監祭酒晉禮部右侍郎兼侍讀學士卒詔贈尚書

田瑄

字希玉大田人隆慶辛未進士初令新昌俗以人命相誣動輒破產瑄痛懲其弊一日行野見田有

渠無水怪問之民曰民力修渠勢家得水何勞為瑄憤然舍郊外督民濬渠且履畝均放之豪強屏息附郭田萬三千畝悉成沃壤民俟其出撫旌前導爭為舉輿陞南戶部主事民攀號不忍舍

鄭沛

字源甫德化人萬厯戊戌進士選計曹嗣督昌平糧儲及主客兵餉護陵寢供湯沐苦心經營操行

彌厲年三十二卒於官朝野惜之

龍巖州

宋

周純

字潛文龍巖州人治平四年進士令建安時建賊廖恩剽掠南劍純募死士千人日夜博戰賊窘至

三日不得食會奉詔招撫賊悉降元祐初以蘇轍薦由御史臺主簿提舉江西常平歲荒留上供米十三

萬斛以賑全活甚衆後以  
朝散大夫直秘閣致仕

### 明

**劉銳**字伯剛寧洋人初為掾吏折節力學永樂辛丑成  
進士授行人陞戶部員外乞歸省沙賊鄧茂七作  
亂逼龍巖衆皆逃去銳曰不戮力討賊非忠也坐觀  
宗黨殄滅非孝也市人從之者數百人會官兵至與  
賊戰不利退守郡城銳率  
衆力戰被執罵賊不屈死

**王源**

字啓澤龍巖州人永樂甲申進士授庶吉士出知  
深澤縣修學教士築長堤以捍水患禁民間嫁娶

論財之俗累上疏言民事有旨名用時西番有異僧  
來朝被厚禮源條陳時政語及之忤旨下錦衣獄尋  
復職擢春坊司直郎嘗侍太子諸王讀王他顧源曰  
臣所言皆治平要道猶怒置之耶遷松江同知奏罷

重額及逋負糧數十萬石姦民褚路等誣奏習左道二百餘家逮繫甚衆悉平反之以薦擢職方郎中出知潮州年八十致仕猶手不釋卷所著有韋庵集書傳補遺家禮易覽異端辨等書

林元

龍巖州人宣德間由貢士歷潮州推官審獄明允釋無辜者百餘人民稱為于公復生改知贛州府

釋龍南良民為賊誣生者十餘家尋卒於官

曾汝檀

字惟馨漳平人嘉靖間以貢入南雍受學於湛若水壬辰成進士授都察院都事時若水為禮

部侍郎朝夕親炙及轉南禮部尚書汝檀亦求改南遷南戶部員外郎擢知撫州首建陸象山吳草廬吳康齋三賢祠立五經閣教民行鄉約月朔臨視政暇與諸生講明正學以拂當道意調南寧遷安慶知府陞山東鹽運使卒於官著有心源問辨錄學者稱為廓齋先生

石應岳

字鍾賢龍巖州人隆慶辛未進士選庶吉士歷戶禮二科給事中疏請祀陳真晟於鄉以崇正

學乞經筵命史官入直登記得失復上廣宗藩節賚予急修省後先十餘疏皆鑿鑿可行擢南太僕寺卿晉應天府尹會海瑞為都御史與應岳相契善民有總憲清如水京兆白於霜之謠改尹順天奉勅提督操江擢貳司馬改少司徒疏乞終養歸

蔡夢說

字君弼龍巖州人萬曆甲戌進士以中書擢御史巡按江南築銅陵堤以廣水利民呼為蔡公

堤及按廣東戢撫瓊饒諸寇又造湖城石梁以禦水患歷官南韶叅政會交趾襲欽州制府令斬級論功夢說嚴止妄殺遂乞歸

魏鳴朝

字端所龍巖州人萬曆戊子舉人性孝友初授泰寧教諭設立學規有蘇湖遺意士習文風蒸

然丕變擢安仁令值歲歉設法賑濟民賴以生又弭盜賊平水患革除一切弊政去之日民立碑以誌不

忘 國朝雍正

九年祀鄉賢祠

連繼芳

字以善龍巖州人萬曆壬辰進士知德清縣歷官廣西按察副使時交夷烏蠻侵擾奉勅征討

屢戰克捷積寇以平南寧潯陽四郡勒碑頌德疏乞終養歸年七十卒於家

連瓚

字鳳雲龍巖州人萬曆間恩貢授興寧司訓署本縣事粵寇趙敏等肆掠瓚率鄉兵殲其渠魁餘黨

奔竄東洋有田千畝被水淹為荒坂民困徵輸瓚築堤捍患田畝悉復士民肖像祀之

王命璿

字君衡龍巖州人萬曆甲辰進士由新會令擢監察御史疏論東宮出閣福藩就封二事條陳

懇摯稅璫高宗肆毒閩中命璿抗疏論之有旨撤回出按粵設溥門叅戎以增防守天啓間歷大廷尉時



魏璫擅權命璫抗章彈劾幾蹈不測以母憂從輕罰俸崇禎間起刑部侍郎中官鄧希詔守口失機璫欲護之命璫執法不回忤中貴意遂告歸後闖賊陷京挈家入萬安山中尋卒

陳六韜

字子儀漳平人崇禎戊辰進士為天津兵備道大閱水師築興濟城增肅寧堞浚交河川為守

禦備時防衛單弱六韜檄各縣令十甲出戍卒一人月斂錢五文五日一操一月之間人戍六日守禦具備屹然畿南保障既而中官盧某出監軍六韜與抗禮盧銜之尋改武德時方有警巡撫方在德聞六韜至延入問計六韜曰德州險阻可守當為都閫捍之後京師告嚴率眾三千人齎糧入衛卒為盧中官所中解官歸家於桃源死甲申之難

柯元伯

字康侯龍巖州人崇禎辛未進士由東陽令入為戶部主事召對稱旨擢河南道御史巡按陝

西茶馬時秦中流寇蹂躪商人失資引元伯設法疏通數十年積窳馬政茶法一一剔清轉汝輝兵備道卒

吳汝宗 寧洋人崇禎末以貢授東阿令有治聲秩滿入覲會李自成陷都義不受辱遂遇害


國朝

李鎮國 漳平人順治四年 大師南下以太學生授雷州司理尋守郡寇陷雷州不屈死

章士穎 龍巖州人順治丁酉舉人授龍安府推官以裁缺改知禮縣縣民素苦亡絕賠累旗軍興屯控

報開墾民多逃亡士穎招撫墾荒常捐俸給以牛種聞風復業者數千家又為申請蠲豁天嘉十九里正供一千二百兩併鞏禮文三衛所糧米二千五百餘石番民來歸諭以大義慰勞備至會吳逆為變受困

四閱月圍解乃釋雍  
正九年祀鄉賢祠



福建通志卷四十八